

舊

唐

書

二十

新學堂

PDG

唐書列傳卷第三十九

狄仁傑孫兼謨

王方慶

姚壽弟珽

劉

等

修

狄仁傑字懷英并州太原人也祖孝緒貞觀中尚書左丞父知遜
薨州長史仁傑兒童時門人有被害者縣吏就詰之衆皆接對唯
仁傑堅坐讀書吏責之仁傑曰黃卷之中聖賢備在猶不能接對
何暇偶俗吏而見責耶後以明經舉授汴州判佐時工部尚書閻
立本爲河南道黜陟使仁傑爲吏人誣告立本見而謝曰仲尼云觀
過知仁矣足下可謂海曲之明珠東南之遺寶薦授并州都督府
法曹其親在河陽別業仁傑赴并州登太行山南望見白雲孤飛
謂左右曰吾親所居在此雲下瞻望佇立久之雲移乃行仁傑孝
友絕人在并州有同府法曹鄭崇質母老且病當充使絕域仁傑
謂曰太夫人有危疾而公遠使豈可貽親萬里之憂乃詣長史閻
仁基請代崇質而行時仁基與司馬李孝廉不協因謂曰吾等豈

獨無愧耶由是相待如初仁傑儀鳳中爲大理丞周歲斷滯獄一萬七千人無冤訴者時武衛大將軍權善才坐誤斫昭陵栢樹仁傑奏罪當免職高宗令即誅之仁傑又奏罪不當死帝作色曰善才斫陵上樹是使我不孝必須殺之左右築仁傑今出仁傑曰臣聞逆龍鱗忤人主自古以爲難臣愚以爲不然居桀紂時則難堯舜時則易臣今幸逢堯舜不懼比干之誅昔漢文時有盜高廟玉環張釋之廷諍罪止笞市魏文將徙其人辛毗引裾而諫亦見納用且明主可以理奪忠臣不可以威懼今陛下不納臣言瞋目之後善見釋之辛毗於地下陛下作法懸之象魏徒派死罪俱有等差豈有犯非極刑則令賜死法旣無常則萬姓何所措其手足陛下必欲變法請從今日爲始古人云假使盜長陵一抔土陛下何以加之今陛下以昭陵一株栢殺一將軍千載之後謂陛下爲何主此臣所以不敢奉制殺善才陷陛下於不道帝意稍解善才因而免死居數日授仁傑侍御史時司農卿韋機兼領將作少府二司高

宗以恭陵玄宮狹小不容送終之具遣機續成其功機於堦之左
右爲便房四所又造宿羽高山上陽等宮莫不壯麗仁傑奏其太
過機竟坐免官左司郎中王本立恃寵用事朝廷惛懼仁傑奏之
請付法寺高宗特原之仁傑奏曰國家雖乏英才豈少本立之類
陛下何惜罪人而虧王法必欲曲赦本立請弃臣於無人之境爲
忠貞將來之誡本立竟得罪繇是朝廷肅然尋加朝散大夫累遷
度支郎中高宗將幸汾陽宮以仁傑爲知頓使并州長史李冲立
以道出妬女祠俗云盛服過者必致風雷之災乃發數萬人別開
御道仁傑曰天子之行千乘萬騎風伯清塵雨師灑道何妬女之
害耶遽令罷之高宗聞之歎曰真大丈夫也俄轉寧州刺史撫和
戎夏入得歡心郡人勒碑頌德御史郭翰巡察隴右所至多所按
劾及入寧州境內耆老歌刺史德美者盈路翰旣授館召州吏謂
之曰入其境其政可知也願成使君之美無爲久留州人方散翰薦
名於朝徵爲冬官侍郎充江南巡撫使吳楚之俗多淫祠仁傑奏

毀一千七百所唯留夏禹吳太伯季札伍員四祠轉文昌右丞出
爲豫州刺史時越王貞稱兵汝南事敗緣坐者六七伯人籍沒者
五千口司刑使逼促行刑仁傑哀其誅誤緩其獄密表奏曰臣欲
顯奏以爲逆人申理知而不言恐乖陛下存恤之旨表成復毀意
不能定此輩咸非本心伏望哀其誅誤特勅原之配流豐州豫囚
次于寧州父老迎而勞之曰我狄使君活汝輩耶相携哭於碑下
齊三日而後行豫囚至涿所復相與立碑頌狄君之德初越王之
亂宰相張光輔率師討平之將士恃功多所求取仁傑不之應光
輔怒曰州將輕元帥耶仁傑曰亂河南者一越王貞耳今一貞死
而萬貞生光輔質其辭仁傑曰明公董戎三十萬平一亂臣不戢
兵鋒縱其暴橫無罪之人肝腦塗地此非萬貞何耶且兇威脅從
勢難自固及天兵暫臨棄城歸順者萬計繩墜四面成蹊公祭
何縱邀功之人殺歸降之衆但恐冤聲騰沸上徹于天如得尚方
斬馬劍加於君頸雖死如歸光輔不能詰心甚銜之還都奏仁傑

不遜左授復州刺史入爲洛州司馬天授三年九月丁酉轉地官侍郎判尚書同鳳閣鸞臺平章事則天謂曰卿在汝南時甚有善政欲知譖卿者乎仁傑謝曰陛下以臣爲過臣當改之陛下明臣無過臣之幸也臣不知譖者並爲善友臣請不知則天深加歎異未幾爲來俊臣誣構下獄時一問即臣者例得減死來俊臣逼脅仁傑令一問臣反仁傑歎曰大周革命萬物唯新唐朝舊臣甘從誅戮反是實俊臣乃少寬之判官王德壽謂仁傑曰尚書必得減死德壽意欲求少階級憑尚書牽楊執柔可乎仁傑曰若何牽之德壽曰尚書爲春官時執柔任其司負外引之可也仁傑曰皇天后土遣仁傑行此事以頭觸柱流血被面德壽懼而謝焉旣臣反所司但待日行刑不復嚴備仁傑求守者得筆硯拚被頭帛書冤置綿衣中謂德壽曰時方熱請付家人去其綿德壽不之察仁傑子光遠得書持以告變則天召見覽之而問俊臣俊臣曰仁傑不免冠帶寢處其安何由伏罪則天使人視之俊臣遽命仁傑巾帶

而見使者乃令德壽代仁傑作謝死表附使者進之則天召仁傑
謂曰臣反何也對曰向若不臣反已死於鞭笞矣何爲作謝死表
曰臣無此表示之乃知代署也故得免死貶彭澤令武承嗣屢奏
請誅之則天曰朕好生惡殺志在恤刑渙汗已行不可更返萬歲
通天年契丹寇陷奚州河北震動徵仁傑爲魏州刺史前刺史獨
孤思莊懼賊至盡驅百姓入城繕修守具仁傑旣至悉放歸農畝
謂曰賊猶在遠何必如是萬一賊來吾自當之必不關百姓也賊
聞之自退百姓咸歌誦之相與立碑以紀恩惠俄轉幽州都督神
功元年入爲鸞臺侍郎同鳳閣鸞臺平章事加銀青光祿大夫
兼納言仁傑以百姓西戍踈勒等四鎮極爲凋弊乃上疏曰臣聞
天生四夷皆在先王封疆之外故東拒滄海西隔流沙北橫大漠
南阻五嶺此天所以限夷狄而隔中外也自典籍所紀聲教所及
三代不能至者國家盡兼之矣此則今日之四境已逾於夏殷者也
詩人矜薄伐於太原美化行於江漢則是前代之遠裔而國家之

域中至前漢時匈奴無歲不陷邊殺掠吏人後漢則西羌侵軼漢中東寇三輔入河東上黨幾至洛陽由此言之則陛下今日之士宇過於漢朝遠矣若其用武荒外邀功絕域竭府庫之實以爭磽确不毛之地得其人不足以增賦獲其土不可以耕織苟求冠帶遠夷之稱不務固本安人之術此秦皇漢武之所行非五帝三皇之事業也若使越荒外以爲限竭資財以騁欲非但不愛人力亦所以失天心也昔始皇窮兵極武以求廣地男子不得耕於野女子不得蠶於室長城之下死者如亂麻於是天下潰叛漢武追高丈之宿憤籍四帝之儲實於是定朝鮮討西域平南越擊匈奴府庫空虛盜賊蜂起百姓嫁妻賣子流離於道路者萬計末年覺悟息兵罷役封丞相爲富人侯故能爲天所祐也昔人有言與覆車同軌者未嘗安此言雖小可以喻大近者國家頻歲出師所費滋廣西戎四鎮東戍安東調發日加百姓虛弊開守西域事等石田費用不支有損無益轉輸靡絕杼軸殆空越磧踰海分兵防守行役

既久怨曠亦多昔詩人云王事靡盬不能藝稷黍豈不懷歸畏此罪咎念彼恭人涕零如雨此則前代怨思之辭也上不是恤則政不行而邪氣作邪氣作則蟲螟生而水旱起若此雖禱祀百神不能調陰陽矣方今關東飢饉蜀漢逃亡江淮已南徭求不息人不復業則相率爲盜本根一搖憂患不淺其所以然者皆爲遠戍方外以竭中國爭蠻貊不毛之地乖子養蒼生之道也昔漢元納賈捐之謀而罷珠崖郡宣帝用魏相之策而弃車師之田豈不欲慕尚虛名蓋憚勞人力也近貞觀年中剋平九姓冊李思摩爲可汗使統諸部者蓋以夷狄叛則伐之降則撫之得推亡固存之義無遠戍勞人之役此則近日之令典經邊之故事竊見阿史那斛瑟羅陰山貴種代雄沙漠若柔安之四鎮使統諸蕃封爲可汗遣禦寇患則國家有繼絕之美荒外無轉輸之役如臣所見請捐四鎮以肥中國罷安東以實遼西省軍費於遠方并甲兵於塞上則恒代之鎮重而邊州之備實矣況綏撫夷狄蓋防其越逸無侵侮之

患則可矣何必窮其窟穴與螻蟻計校長短哉且王者外寧必有
內憂蓋爲不勤修政故也伏惟陛下并之度外無以絕域未平爲
念但當勅邊兵謹守備蓄銳以待敵待其自致然後擊之此李牧
所以制匈奴也當今所要者其若令邊城警守遠備斥候聚軍實
蓄威武以逸待勞則戰士力倍以主禦客則我得其便堅壁清野
則寇無所得自然賊深入必有顛躓之慮淺入必無虜獲之益如
此數年可使二虜不擊而服矣仁傑又請廢安東復高氏爲君長
俾江南之轉輸慰河北之勞弊數年之後可以安人富國事雖不行
識者是之尋檢校納言兼右肅政臺御史大夫聖曆初突厥侵掠
趙定等州命仁傑爲河北道元帥以便宜從事突厥盡殺所掠男
女萬餘人從五迴道而去仁傑惣兵十萬追之不及便制仁傑何
北道安撫大使時河朔人庶多爲突厥逼脅賊退後懼誅又多逃
匿仁傑上疏曰臣聞朝廷議者以爲契丹作梗始明人之逆順或
因迫脅或有願從或受僞官或爲招慰或兼外賊或是土人跡雖

不同心則無別誠以山東雄猛由來重氣一顧之勢至死不回近緣軍機調發傷重家道悉破或至逃亡剔屋賣田人不爲售內顧生計四壁皆空重以官典侵漁因事而起取其髓腦曾無心媿修築城池繕造兵甲州縣役使十倍軍機官司不矜期之必取枷杖之下痛切肌膚事迫情危不循禮義愁苦之地不樂其生有利則歸且圖賒死此乃君子之愧辱小人之常行人猶水也壅之則爲泉䟽之則爲川通塞隨派豈有常性昔董卓之亂神器播遷及卓被誅部曲無赦事窮變起毒害生人京室丘墟化爲禾黍此由恩不普洽失在機先臣一讀此書未嘗不廢卷歎息今以負罪之伍必不在家露宿草行潛竄山澤赦之則出不赦則狂山東羣盜緣茲聚結臣以邊塵暫起不足爲憂中土不安以此爲事臣聞持大國者不可以小道理事廣者不可以細分人主恢弘不拘常法罪之則衆情恐懼怨之則反側自安伏願曲赦河北諸州一無所問自然人神道暢率土歡心諸軍凱旋得無侵擾制從之軍還授

內史聖曆三年則天幸三陽宮王公百寮咸經侍從唯仁傑特賜宅二區當時恩寵無比是歲六月左玉鈐衛大將軍李楷固右武威衛將軍駱務整討契丹餘衆擒之獻俘於含樞殿則天大悅特賜楷固姓武氏楷固務整並契丹李盡忠之別帥也初盡忠之作亂楷固等屢率兵以陷官軍後兵敗來降有司斷以極法仁傑議以爲楷固等並有驍將之才若恕其死必能感恩効節又奏請授其官爵委以專征制並從之及楷固等凱旋則天召仁傑預宴因舉觴親勸歸賞於仁傑授楷固左玉鈐衛大將軍賜爵燕國公則天又將造大像用功數百萬令天下僧尼每日出一錢以助成之仁傑上疏諫曰臣聞爲政之本必先人事陛下矜羣生迷謬溺喪無歸欲令像教兼行觀相生善非爲塔廟必欲崇奢豈令僧尼皆須檀施得棧尚捨而況其餘今之伽藍制過宮闕窮奢極壯畫績盡工寶技殫於綴飾環材竭於輪奐工不使鬼止在役人物不天來終須地出不損百姓將何以求生之有時用之無度編戶所

奉常若不充痛切肌膚不辭筆撻遊僧一說矯陳禍福剪髮解衣
仍慙其少亦有離閒骨肉事均路人身自納妻謂無彼我皆託佛
法誑誤生人里陌動有經坊闐闐亦立精舍化誘倍急切於官徵
法事所須嚴於制勅膏腴美業倍取其多水碾莊園數亦非少逃
丁避罪併集法門無名之僧凡有幾萬都下檢括已得數千且一
夫不耕猶受其弊浮食者衆又劫人財臣每思惟實所悲痛往在
江表像法盛興梁武簡文捨施無限及其三淮沸浪五嶺騰煙列
刹盈衢無救危亡之禍緇衣蔽路豈有勤王之師比年已來風塵
屢擾水旱不節征役稍繁家業先空瘡痍未復此時興役力所
未堪伏惟聖朝功德無量何必要營大像而以勞費爲名雖斂僧
錢百未支一尊容旣廣不可露居覆以百層尚憂未徧自餘廊廡
不得全無又云不損國財不傷百姓以此事主可謂盡忠臣今思
惟兼採衆議咸以爲如來設教以慈悲爲主下濟羣品應是本心
豈欲勞人以存虛飾當今有事邊境未寧宜寬征鎮之徭省不急

之費設令雇作皆以利趨既失田時自然弃本今不樹稼來歲必
饑役在其中難以取給況無官助義無得成若費官財又盡人力
一隅有難將何救之則天乃罷其役是歲九月病卒則天爲之舉
哀廢朝三日贈文昌右相諡曰文惠仁傑常以舉賢爲意其所
引拔相彥範韞暉竇懷貞姚崇等至公卿者數十人初則天嘗
問仁傑曰朕要一好漢任使有乎仁傑曰陛下作何任使則天曰
朕欲待以將相對曰臣料陛下若求文章資歷則今之宰臣李嶠
蘇味道亦足爲文吏矣豈非文士齷齪思得奇才用之以成天下
之務者乎則天悅曰此朕心也仁傑曰荊州長史張柬之其人雖
老真宰相才也且久不遇若用之必盡節於國家矣則天乃召拜
洛州司馬他日又求賢仁傑曰臣前言張柬之猶未用也則天曰
已遷之矣對曰臣薦之爲相今爲洛州司馬非用之也又遷爲秋
官侍郎後竟召爲相柬之果能興復中宗蓋仁傑之推薦也仁
傑嘗爲魏州刺史吏吏爲立生祠及去職其子暉爲魏州司功叅

軍頗貪暴爲人所惡乃毀仁傑之祠長子光嗣聖歷初爲司府丞則天令宰相各舉尚書郎一人仁傑乃薦光嗣拜地官員外郎蒞事稱職則天喜而言曰祁奚內舉果得其人開元七年自汴州刺史轉揚州大都督府長史坐貶歙州別駕卒初中宗在房陵而吉頊李昭德皆有匡復讜言則天無復辟意唯仁傑每從容奏對無不以子母恩情爲言則天亦漸省悟竟召還中宗復爲儲貳初中宗自房陵還宮則天匿之帳中召仁傑以廬陵爲言仁傑慷慨數奏言發涕洟遽出中宗謂仁傑曰還卿諸君仁傑降階泣賀旣已奏曰太子還宮人無知者物議安審是非則天以爲然乃復置中宗於龍門具禮迎歸人情感悅仁傑前後匡復奏對凡數萬言開元中北海太守李邕撰爲梁公別傳備載其辭中宗反正追贈司空睿宗追封梁國公仁傑族曾孫兼謨

兼謨登進士第祖郊父邁仕官皆微兼謨元和末解褐襄陽推官試校書郎言行剛正使府知名憲宗召爲左拾遺累上書言事歷

尚書郎長慶大和中歷鄭州刺史以治行稱入為給事中開成初
度支左藏庫妄破漬污縑帛等贓罪文宗以事在赦前不理兼謨
封還勅書文宗召而諭之曰嘉卿舉職然朕已赦其長官典吏亦
宜在宥然事或不可卿勿以封勅為艱遷御史中丞謝日文宗顧
謂之曰御史臺朝廷綱紀臺綱正則朝廷理朝廷正則天下理凡
執法者大抵以畏忌顧望為心職業由茲不舉卿梁公之後自有
家法豈復為常常之心哉兼謨謝曰朝法或未得中臣固悉心彈
奏會江西觀察使吳士矩違額加給軍士破官錢數十萬計兼謨
奏曰觀察使守陛下土地宣陛下詔條臨戎賞軍州有定數而士
矩與奪由己盈縮自專不唯貽弊一方必致諸軍援例請下法司
正行朝典士矩坐貶蔡州別駕兼謨尋轉兵部侍郎明年檢校工
部尚書太原尹充河東節度使會昌中累歷方鎮卒

王方慶雍州咸陽人也周少司空石泉公褒之曾孫也其先自琅
琊南度居於丹陽為江左冠族褒北徙入關始家咸陽焉祖鼎隋

衛尉丞伯父弘讓有美名貞觀中爲中書舍人父弘直爲漢王元昌友畋獵無度乃上書切諫其略曰夫宗子維城之託者所以固邦家之業也大王功無任城戰剋之効行無河間樂善之譽爵高五等邑富千室當思答極施之洪慈保無疆之永祚其爲計者在乎修德冠履詩禮畋獵史傳覽古人成敗之所由鑒旣往存亡之異軌覆前戒後居安慮危奈何列騎齊驅交橫龍畝野有遊客巷無居人貽衆庶之憂逞一情之樂從禽不息寔用寒心元昌覽書而遽止漸見疎斥轉荆王友龍朔中卒方慶年十六起家越王府叅軍嘗就記室任希古受史記漢書希古遷爲太子舍人方慶隨之卒業永淳中累遷太僕少卿則天臨朝拜廣州都督廣州地際南海每歲有崑崙乘舶以珍物與中國交市舊都督路元睿冒求其貨崑崙懷刃殺之方慶在任數載秋毫不犯又管内諸州首領舊多貪縱百姓有詣府稱冤者府官以先受首領叅餉未嘗鞫問方慶乃集止府寮絕其交往首領縱暴者悉繩之由是境內清肅

當時議者以爲有唐已來治廣州者無出方慶之右有制廢之
曰朕以卿歷職著稱故授此官既美化遠聞實副朝寄今賜卿雜
綵六十段并瑞錦等物以彰善政也證聖元年召拜洛州長史尋
加銀青光祿大夫封石泉縣男萬歲登封元年轉并州長史封琅
琊縣男未行遷鸞臺侍郎同鳳閣鸞臺平章事俄轉鳳閣侍
郎依舊知政事神功元年七月清邊道大撻管建安王攸宜破契
丹凱還欲以是月詣闕獻俘內史王及善以爲將軍入城例有軍
樂旣今上孝明高皇帝忌月請備而不奏方慶奏曰臣按禮經
但有忌日而無忌月晉穆帝納后用九月九日是康帝忌月于時
持疑不定下太常禮官荀訥議稱禮祇有忌日無忌月若有忌月
即有忌時忌歲益無理據當時從訥所議軍樂是軍容與常不
等臣謂振作於事無嫌則天從之則天嘗幸萬安山玉泉寺以山
逕危懸欲御輦輿而上方慶諫曰昔漢元帝嘗祭廟出便門御樓
舩光祿勳張猛奏曰乘舩危就橋安元帝乃從橋即前代舊事今

山徑危險石路曲狹上瞻駭目下視寒心比於樓船安危不等陛下蒸人父母奈何踐此畏塗伏望停輿駐蹕則天納其言而止是歲改封石泉子時有制每月一日於明堂行告朔之禮司禮博士辟閭仁謂奏議其略曰經史正文無天子每月告朔之事唯禮記玉藻云天子聽朔於南門之外其每月告朔者諸侯之禮也臣謹按禮論及三禮義宗江都集禮貞觀禮顯慶禮及祠令無天子每月告朔之事若以爲無明堂故無告朔之禮有明堂即合告朔則周秦有明堂而無天子每月告朔之事臣等叅求旣無其禮不可習非天子之尊而用諸侯之禮方慶又奏議其略曰明堂天子布政之宮也謹按穀梁傳云閏者附月之餘日天子不以告朔非禮也閏以正時時以作事事以厚生生人之道於是乎在矣不告閏朔棄時政也臣據此文則天子閏月亦告朔矣寧有他日而廢其禮乎先儒舊說天子行事一年十八度入明堂矣大享不問卜入也每月告朔十二入也四時迎氣四入也巡狩之年一入也今禮

官議唯歲首一入耳與先儒既異在臣不敢同宋朝何承天纂集其文以爲禮論雖加編次事則闕如梁代崔靈恩撰三禮義宗但摭撫前儒因循故事而已隋煬帝命學士撰江都集禮祇抄撮舊禮更無異文貞觀顯慶禮及祠令不言告朔者蓋爲歷代不傳所以其文乃闕各有緣由不足依據今禮官引爲明證在臣誠實有疑則天又令春官廣集衆儒取方慶仁謂所奏議以定得失時成均博士吳揚善太學博士郭仙惲等奏案周禮及三傳皆有天子告朔之禮秦滅詩書由是告朔禮廢望依方慶議有制從之則天以方慶家多書籍嘗訪求右軍遺跡方慶奏曰臣十代從伯祖羲之書先有四十餘紙貞觀十二年太宗購求先臣並已進之唯有一卷見今在又進臣十一代祖導十代祖洽九代祖珣八代祖雲首七代祖僧綽六代祖仲寶五代祖騫高祖規曾祖褒并九代三從伯祖晉中書令獻之已下二十八人書共十卷則天御武成殿示羣臣仍令中書舍人崔融爲寶章集以敘其事復賜方慶當時

甚以爲榮方慶又舉令文替喪大功未葬不預朝賀未終喪不預宴會比來朝官不遵禮法身有哀容陪預朝會手舞足蹈公違憲章名教旣虧實玷皇化伏望申明令式更禁斷從之方慶漸以老疾乞從閑逸乃授麟臺監修國史及中宗立爲東宮方慶兼檢校太子左庶子聖曆二年壹月則天欲季冬講武有司稽緩延入孟春方慶上疏曰謹按禮記月令孟冬之月天子命將帥講武習射御角力此乃三時務農一時講武以習射御角校才力蓋王者常事安不忘危之道也子丑春之月不可以稱兵兵者甲冑干戈之摠名兵金性刻木春盛德在木而舉金以害盛德逆生氣孟春行冬令則水潦爲敗雪霜入摠首種不入蔡邕月令章句云太陰新休少陽尚微而行冬令以導水氣故水潦至而敗生物也雪霜大摠折陽者也太陰干時雨雪而霜故大傷首種首種謂宿麥也麥以秋種故謂之首種入收也春爲沍寒所傷故至夏麥不成長也今孟春講武是行冬令以陰政犯陽氣害發生之德臣恐水潦敗

物霜雪損稼夏麥不登無所收入也伏望天恩不違時令至孟冬
教習以順天道手制荅曰比爲久屬太平多歷年載人皆廢戰並
悉學文今者用整兵威故令教習卿以春行冬令則水潦爲敗舉
金傷木則便害發生循覽所陳深合典禮若違此請乃月令虛
行佇啓直言用依來表是歲正授太子左庶子封石泉公餘並如
故俸料同職事三品兼侍皇太子讀書方慶又上言謹按史籍所
載人臣與人主言及上表未有稱皇太子名者當爲太子皇儲其
名尊重不敢指斥所以不言晉尚書僕射山濤啓事稱皇太子而
不言名濤中朝名士必詳典故其不稱名應有憑准朝官尚猶
如此官臣諱則不疑今東宮殿及門名皆有觸犯臨事論啓迴避
甚難孝恭皇帝爲太子時改弘教門爲崇教門沛王爲皇太子改
崇賢館爲崇文館皆避名諱以遵典禮此即成例足爲軌模伏
望天恩因循舊式付司改換制從之長安二年五月卒贈兗州都
督諡曰貞中宗即位以宮寮之舊追贈吏部尚書方慶博學好著

述所撰雜書凡二百餘卷尤精三禮好事者多詢訪之每所酬答咸有典據故時人編次名曰禮雜答問聚書甚多不減秘閣至於圖畫亦多異本諸子莫能守其業卒後尋亦散亡長子光輔開元中官至潞州刺史少子駿王書知名尤善琴瑟而性多嚴敕管至殿中侍御史

姚璿字令璋散騎常侍思廉之孫也少孤撫弟妹以友愛稱博涉經史有才辯永徽中明經擢第累補太子宮門郎與司議郎孟利貞等奉令撰瑤山玉彩書書成遷秘書郎調露中累遷至中書舍人封吳興縣男則天臨朝遷夏官侍郎坐從父弟敬節同徐敬業之亂貶桂州都督府長史時則天雅好符瑞璿至嶺南訪諸山川草樹其名號有武字者皆以爲上膺國姓列奏其事則天大悅召拜天官侍郎善於選補時人稱之長壽二年遷文昌左丞同鳳閣鸞臺平章事自永徽已後左右史雖得對仗承旨仗下後謀議皆不預聞璿以爲帝王謨訓不可暫無紀述若不宜自宰相史官

無從得書乃表請伏下所言軍國政要宰相一人專知撰錄號爲時政記每月封送史館宰相之撰時政記自璫始也是歲九月坐事轉司賓少卿罷知政事延載初擢拜納言有司以璫從父弟犯法奏言不合更爲侍臣璫上言昔王敦稱兵犯順王導仍典樞機嵇康戮於晉朝嵇紹忠於晉室竊惟前古尚不爲疑今奉聖恩豈由臣下必以體例有乖伏請甘從屏退則天曰此乃我意卿復何言但當盡忠無聽浮說時武三思率蕃夷酋長請造天樞於端門外刻字紀功以頌周德璫爲督作使證聖初璫加秋官尚書同平章事是歲明堂災則天欲責躬避正殿璫奏曰此實人火非曰天災至如成周宣榭卜代愈隆漢武建章盛德彌永臣又見彌勒下生經云當彌勒成佛之時七寶臺須臾散壞覩此無常之相便成正覺之因故知聖人之道隨緣示化方便之利博濟良多可使由之義存於此況今明堂乃是布政之所非宗廟之地陛下若避正殿於禮未爲得也左拾遺劉承慶廷奏云明堂宗祀之所今旣被

焚陛下宜輟朝思過璫又前議以爭之則天乃依璫奏先令璫監造天樞至是以功當賜爵一等璫表請迴贈父一官乃追贈其父豫州司戶參軍處平為博州刺史天后將封嵩岳命璫惣知撰儀注并充封禪副使及重造明堂又令璫充使督作以功加銀青光祿大夫時有大石國使請獻師子璫上疏諫曰師子猛獸唯止食肉遠從碎葉以至神都內既難得極為勞費陛下以百姓為心慮一物有失鷹犬不若畝獵惣停運不殺以闡大慈垂好生以敷至德凡在翔飛蠢動莫不感荷仁恩豈容自菲薄於身而厚資給於獸求之至理必不然乎疏奏遽停來使又九鼎初成制令黃金千兩塗之璫進諫曰夫鼎者神器貴在質朴自然無假別為浮飾臣觀其狀先有五彩輝煥錯雜其間豈待金色方為炫燿則天又從之尋屬契丹犯塞命梁王武三思為榆關道安撫大使璫為副使以備之及還坐事神功初左授益州大都督府長史蜀中官吏多貪暴璫屢有劾劾無所容則天嘉之降璽書勞之曰

夫嚴霜之下識貞松之擅奇疾風之前知勁草之爲貴物既有此
人亦宜哉卿早荷朝恩委任斯重居中作相弘益已多防邊訓兵
心力俱盡歲寒無改終始不渝迺眷蜀中賸俗殷雜久缺良守弊
於侵漁政以賄成人無厝足是用命卿出鎮寄茲存養果能攬
轡澄清下車整肅吏不敢犯姦無所容前後糾擿蓋非一緒貪殘
之伍屏跡於列城剽奪之儔遁形於外境詐勞朞月康此黎元
言念德聲良深嘉尚宜布琅瑯之化當以豫州爲法則天又嘗謂
侍臣曰凡爲長官能清自身者甚易清得寮吏者甚難至於姚璿
可謂兼之矣時新都丞朱待辟坐賊至死逮捕繫獄待辟素善沙
門理中陰結諸不逞因待辟以殺璿爲名擬據巴蜀爲亂人密表
告之者制令璿按其獄璿深持之事涉疑似引而誅死者僅以千
數則天又令洛州長史宋元爽御史中丞霍獻可等重加詳覆亦
無所發明逮繫獄數百人不勝酷毒遞相附會以就反狀因此藉
沒者復五十餘家其餘稱知反配流者亦十八九道路寃之監察

御史素恕已劾奏其事則天初令璿與恕已對定又尋令罷推俄拜地官尚書歲餘轉冬官尚書仍西京留守長安中累表乞骸骨制聽致仕進爵爲伯遇官名復舊爲工部尚書神龍元年卒遺令薄葬贈越州都督諡曰成弟珙

珙少好學以勤苦自立舉明經累除定汴滄號幽等五州刺史加銀青光祿大夫轉泰州刺史以善政有聞遷書裏美賜絹百匹神龍元年累封宣城郡公三遷太子詹事仍兼左庶子時節愍太子舉事不法珙前後上書進諫今載四事其一曰臣聞賈誼曰選天下之端士孝悌博聞有道術者使與太子居處出入故太子見正事聞正言行正道左右前後皆正人也夫習與正人居之不能無正習與不正人居之不能無不正太子旣冠成人免於保傅之嚴則有記過之史徹膳之宰進善之旌誹謗之木敢諫之鼓瞽史誦箴大夫進謀故習其智化其心成夫教得而左右正則太子正矣太子正而天下定矣臣又聞之木從繩則正后從諫則聖善言古者

所以驗於今伏惟殿下睿德洪深天姿聰敏近代成敗前古安危
莫不懸鑒在心動合典禮臣以庸朽濫居輔弼虛備耳目叨預股
肱輒薦塵露庶裨山海伏以內置作坊工巧得入宮闈之內禁衛之
所或言語內出或事狀外通小人無知不識輕重因爲詐僞有玷
徽猷臣望並付所司以停宮內造作如或要須役造猶望宮外安
置庶得工匠不於宮禁出入其二曰臣聞漢文帝身衣弋絺足履
革舄齊高帝欄檻用銅者皆易以鐵經侯帶玉具劔環珮以過
魏太子不視經侯曰魏國亦有寶乎太子曰主信臣忠魏之寶也
經侯委劔珮而去太子使追還之謂曰珠玉珍玩寒不可衣飢不
可食無遺我賊經侯杜門不出臣觀聖賢經藉務以簡素爲貴皇
王政化皆以菲薄爲德伏惟殿下留心恭儉靡尚浮奢臣愚猶望
損之又損之居簡以行簡減省造作節量用度其三曰臣聞銀榜
銅樓官闈嚴秘門閤來往皆有簿曆殿下時有所須唯門司宣
令或恐姦僞之輩因此妄爲增減脫有文狀舛錯事理便即差違

且近日呂昇之便乃代署宜勅伏賴殿下睿敏當即覺其姦僞自
餘臣下庸淺豈能深辯眞虛望墨令及覆事行下並用內印印畫
署之後眞得免有詐假乃是長久規模臣又聞之忠臣事君有犯
而無隱明主馭下納諫以進德故書云有言逆於志必求諸道有
言順於心必求諸非道伏惟殿下仁明昭著聖躬日躋探幽洞微
窮神索隱事之善惡毫釐靡老理有危疑錙銖無爽臣以庸謏叨
侍春闈職居獻替豈敢緘默其四曰臣聞聖人不專其德賢者
必有所師故曰與善人言如入芝蘭之室久自芬芳與不善人言如
火銷膏不覺而盡今司經見無學士供奉未有侍讀伏望時因規
膳奏請置人所冀講席談筵務盡忠規之道披文擷句方資審諭
之勤臣又聞臣之事主必盡乃誠君之進賢務求忠讜伏惟殿下
養德儲闡以端靜爲務恭膺守器以學業爲先經所以立行修
身史所以諳識成敗雅誥旣習忠孝乃成傳記方通安危斯辨知
父子君臣之道識古今鑒戒之規經史爲先斯乃急務至於工巧

造作寮吏直司實爲末事無足勞慮臣以庸淺獻替是司臣而不
言負譴聖日言而獲罪是所甘心伏願留意經書簡略細事一蒙
採納萬損無辭允降儲明俯矜狂瞽疏奏太子雖稱善言不悛革
太子敗詔遣索其宮中得班諫書中宗嘉其切直時宮臣皆貶黜
唯班擢拜右散騎常侍歲餘遷秘書監睿宗即位累授戶部尚
書轉太子賓客先天二年加金紫光祿大夫復拜戶部尚書班與
兄璿數年間俱爲定州刺史戶部尚書時人榮之開元二年卒年
七十四班嘗以其曾祖察所撰漢書訓纂多爲後之注漢書者隱
沒名氏將爲己說班乃撰漢書紹訓四十卷以發明舊義行於代
史臣曰天子有諍臣七人雖無道不失其天下致廬陵復位唐祚
中興諍由狄公一人以蔽或曰許之太甚荅曰當革命之時朋邪甚
衆非推誠竭力致身忘家者孰能與於此乎仁傑流死不避骨鯁
有彰雖逢好殺無辜能使終畏大義音存天下豈不然乎王方
慶干城南海羽翼東宮臺閣樞機無不功濟所謂君子不器者

也苟非文學斯焉取斯璿成都布政始卒不作相國上章或否或
中且焚明堂而避正殿固諍何多黜唐頌而立天樞言非措矧乃
接求符瑞已失忠貞精擇楚茅難裨過咎不常其德罔畏承蕃
班規諫有才牧守多善儲幄之任可謂得人

贊曰犯顏忤旨返政扶危是人難事狄能有之終替武氏克復唐
基功之莫大人無以師方慶之才周旋特立璿也無常班能操執

唐書列傳卷第三十九

右文林郎充兩浙東路提舉茶鹽司幹辦公事蘇之勤校勘

唐書列傳卷第四十

劉 响

王及善

杜景儉

朱敬則

楊再思

李懷遠

子景伯景伯子彭年附

豆盧欽望

張光輔崔元綜

史務微周允元附

王及善洛州邯鄲人也父君愕隋大業末并州人王君廓掠邯鄲君愕往說君廓曰方今萬乘失御英雄競起誠宜撫納遺亡保全形勝按甲以觀時變擁衆而歸具主此富貴可圖也今足下居無尺土之地守無兼旬之糧恣行殘忍所過攘袂竊爲足下寒心矣君廓曰計將安出君愕爲陳井陘之險可先往據之君廓從其言乃屯井陘山歲餘會義師入定關中乃與君廓率所部萬餘人來降拜大將軍頻以戰功封新興縣公累遷左武衛將軍從太宗征遼東兼領左屯營兵馬與高麗戰於駐蹕山君愕先鋒陷陣力戰而死太宗深痛悼之贈左衛大將軍幽州都督邢國公賜東園秘器陪葬昭陵及善年十四以父死王事授朝散大夫襲爵邢



國公高宗時累遷左奉裕率孝劼之居春宮因宴集命宮官擲
倒次至及善辭曰殿下自有樂官臣止當守職此非臣任也臣將
奉今恐非殿下羽翼之備太子謝而遣之高宗聞而特加賞慰賜
綰百匹尋除右千牛衛將軍高宗謂曰朕以卿忠謹故與卿三品
要職他人非搜辟不得至朕所卿佩大橫刀在朕側知此官貴否
俄以病免尋起爲衛尉卿垂拱中歷司屬卿時山東飢及善爲巡
撫賑給使尋拜春官尚書秦州都督轉益州大都督府長史以
老病請乞致仕加授光祿大夫後契丹作亂山東不安起授滑州
刺史則天謂曰邊賊反叛卿雖疾病可將妻子日行三十里緩步
至彼與朕卧理此州以斷河路也因問朝廷得失及善備陳理亂
之宜十餘道則天曰彼末事也此爲本也卿不可行乃留拜內史
時御史中丞來俊臣常以飛禍陷良善自侯王將相被其羅織受
戮者不可勝計後俊臣坐事繫獄有司斷以極刑則天欲赦之
及善執奏曰俊臣兇狡不軌所信任者皆屠販小人所誅戮者多

名德君子臣愚以爲若不勦絕元惡恐搖動朝廷禍從此始則天納之俄而則天將追廬陵王立爲太子及善贊成其計及太子立又請太子外朝以慰人心則天從之及善雖無學術在官每以清正見知臨事難奪有大臣之節時張易之兄弟恃寵毒內宴皆無人臣之禮及善數奏抑之則天不悅謂及善曰卿旣高年不宜更侍遊讌但檢校閤中可也及善因病請假月餘則天都不問之及善歎曰豈有中書令而天子得一日不見乎事可知矣乃上疏乞骸骨三上不許聖曆二年拜文昌左相旬日而薨年八十二廢朝三日贈益州大都督諡曰貞陪葬乾陵

杜景儉冀州武邑人也少舉明經累除殿中侍御史出爲益州錄事參軍時隆州司馬房嗣業除益州司馬除書未到即欲視事又鞭笞僚吏將以示威景儉謂曰公雖受命爲此州司馬而州司未受命也何藉數日之祿而不待九重之旨即欲視事不亦急耶嗣業益怒景儉又曰公今持咫尺之制真僞未知即欲攬一州之權

誰敢相保揚州之禍非此類耶乃叱左右各令罷散嗣業慙赦而止俄有制除嗣業荊州司馬竟不如志人吏謂之語曰錄事意與天通益州司馬折威風景儉由是稍知名入爲司賓主簿轉司刑丞天授中與徐有功來俊臣侯思止專理制獄時人稱云遇徐杜者必生遇來侯者必死累遷洛州司馬尋轉鳳閣侍郎同鳳閣鸞臺平章事則天常以季秋內出梨花一枝示宰臣曰是何祥也諸宰臣曰陛下德及草木故能秋木再花雖周文德及行葦無以過也景儉獨曰謹按洪範五行傳陰陽不相奪倫瀆之即爲災又春秋云冬無愆陽夏無伏陰春無淒風秋無苦雨今已秋矣草木黃落而忽生此花瀆陰陽也臣慮陛下布教施令有虧禮典又臣等忝爲宰臣助天理物理而不和臣之罪也於是再拜謝罪則天曰卿具宰相也延載初爲鳳閣侍郎周允元奏景儉黨於李昭德左遷秦州刺史後累除司刑卿聖曆二年復拜鳳閣侍郎同鳳閣鸞臺平章事時契丹入寇河北諸州多陷賊中及事定河內

王武懿宗將盡論其罪景儉以爲皆是驅逼非其本心請悉原之則天竟從景儉議歲餘轉秋官尚書坐漏洩禁中語左授司刑少卿出爲并州長史道病卒贈相州刺史子澄頗以文藻著名官至鞏縣尉

朱劼則字少連亳州永城人也代以孝義稱自周至唐三代旌表門標六闕州黨美之劼則個儻重節義早以辭學知名與三從兄同居財產無異又與左史江融左僕射魏元忠特相友善咸亨中高宗聞而召見與語甚奇之將加擢用爲中書舍人李劼立所毀乃授洹水尉長壽中累除右補闕劼則以則天初臨朝稱制天下頗多流言異議至是旣漸寧晏宜絕告密羅織之徒上疏曰臣聞李斯之相秦也行申商之法重刑名之家杜私門張公室并無用之費損不急之官惜日愛功疾耕急戰人繫國富乃屠諸侯此救弊之術也故曰刻薄可施於進趨變詐可陳於攻戰兵猶火也不戢將自焚況鋒鏑已銷石城又毀諒可易之以寬泰潤之以淳

和八風之樂以柔之三代之禮以導之秦既不然淫虐滋甚往而不返卒至土崩此不知變之禍也陸賈叔孫通之事漢王也當滎陽成臯之間糧饋已窮智勇俱困不敢開一說効一奇唯進豪猾之材薦貪暴之客又區宇適平干戈戢金鼓之聲未歇傷痍之痛尚聞二子顧眄綽有餘態乃陳詩書說禮樂開王道謀帝圖高皇帝忿然曰吾以馬上得之安事詩書乎對曰馬上得之可馬上理之乎高皇默然於是陸賈著新語叔孫通定禮儀始知天子之尊此知變之善也向使高皇排二子而不教置詩書而不顧重攻戰之吏尊首級之材揔道爭功張良已知其變拔劔擊柱吾屬不得無謀即晷漏難逾何十二帝乎亡秦續何二百年乎故曰仁義者聖人之蘧廬禮經者先王之陳迹然則祝祠向畢菊狗須投淳精已涿糟粕可弃仁義尚捨況輕此者乎自文明草昧天地屯蒙三叔派言四凶構難不設鈎距無以應天順人不切刑名不可摧姦息暴故置神器開告端曲直之影必呈包藏之心盡露神道助

直無罪不除人心保能無妖不戮以茲妙筭窮造化之幽深用此
神謀入天人之秘術故能計不下席聽不出閭蒼生晏然紫宸易
主大哉偉哉無得而稱也豈比造攻鳴條大戰牧野血變草木頭
折不周可同年而語乎然而急趨無善迹促柱少和聲拯溺不規
行療飢非鼎食即向時之妙策乃當今之勦狗也伏願覽秦漢之
得失考時事之合宜審糟粕之可遺覺遽廬之須毀見機而作豈
勞終日乎陛下必不可偃蹇太平徘徊中路伏願改法制立章程
下恬愉之辭流曠蕩之澤去萋菲之牙角頓茲險之鋒芒窒羅織
之源掃朋黨之迹使天下蒼生坦然大悅豈不樂哉則天甚善之
歟則長安三年累遷正諫大夫尋同鳳閣鸞臺平章事時御史
大夫魏元忠鳳閣舍人張說爲張易之兄弟所誣構將陷重辟諸
宰相無敢言者說則獨抗跡申理曰元忠張說素稱忠正而所坐
無名若令得罪豈不失天下之望也乃得減死四年以老疾請罷
知政事許之累轉冬官侍郎仍依舊兼修國史張易之昌宗嘗

命畫工圖寫武三思及納言李嶠鳳閣侍郎蘇味道夏官侍郎李
迥秀麟臺少監王紹宗等十八人形像號爲高士圖母引劬則預
其事固辭不就其高索守正如此神龍元年出爲鄭州刺史尋以
老致仕二年侍御史冉祖雍素與劬則不協乃誣奏云與王同皎
親善貶授廬州刺史經數月洎代到還鄉里無淮南一物唯有所
乘馬一匹諸子姪步從而歸劬則重然諾善與人交每拯人急難
不求其報又嘗與三從兄同居四十餘年財產無異雅有知人之鑒
凡在品論者後皆如其言景龍三年五月卒于家年七十五劬則
嘗採魏晉已來君臣成敗之事著十代興亡論又以前代文士論
廢五等者以秦爲失事未折衷乃著五等論曰昔秦廢五等崔寔
仲長統王卽曹同等皆以爲秦之失予竊異之試通其志云蓋明
王之理天下也先之以博愛本之以仁義張四維尊五美懸禮樂於
庭宇置軌範於中衢然後波立波使橫派揚薰風以高扇浮桴佛
之甘澤浸曠蕩之膏腴正理革其淫邪淳風柔其骨髓使天下之

人心醉而神足其於忠義也立則見其參於前其於進趨也若章
程之在目禮經所及等日月之難踰聲教所行雖風雨之不輟聖
人知俗之漸化也王道之已行也於是體國經野庸功勲親分山
裂河設盤石之固內守外禦有維平城之基連絡徧於城中膠葛盡
於封內雖道昏時喪澤竭政塞鄭伯逐王申侯弑主魯不供物宋
不成周吳徵伯牢楚問九鼎小白之二匡天下重耳之二戰諸侯無君
之迹顯然篡奪之謀中寢者直以周禮尚存簡書不隕故曰不敢
失墜天威在顏自春秋之後禮義漸頹風俗塵昏愧恥心盡疾走
先得者爲上奪攘知命者爲能加以八世專齊三家分晉子貢之
亂五國蘇秦之闢七雄苛刻薄興經籍道息莫不長詐術貴攻
戰萬姓皆戴爪牙無人不屬甯距所以商鞅欺故友李斯囚舊交
孫臏喪足於龐涓張儀得志于陳軫一旅之衆便欲稱王再戰之
雄爭來奉帝先王會盟之禮昔時樽俎之容三代玄風掃地至盡
況始皇削平區宇殊非至公李斯之作股肱罕循大道人無見德

唯虐是聞當此時也主猜於上人駭於下父不能保之於子君不能得之於臣欲使始皇分土英雄建侯薄俗若削晉鄭之可依使借賊兵而資盜糧寄龍魚而助風雨不可行也是以秦鑒周德之綿深懼己圖之不遠罷侯置守高下在心天下制在一人百姓不聞二主直是不得行世封非薄功臣而賤骨肉也高皇帝揭日月之明懷天地之量筭財不足以分賞論地不足以受封邑皆百城土有千里人殷國富地廣兵強五十年間七國同反賈誼憂其國失鼂錯請削其地若言由大而反也不若召陵之師踐土之衆也若言有地而起也劉濞非王霸之材田祿無先管之略直是齊晉以逆禮爲慙吳楚以犯上非媿豐由教起其所由來遠矣自此之後雜霸又衰中興不能遠復紆觀漢魏之際尋其經緯之初未有積德重光澤及萬物觀其敦偷薄於秦風察其人豺狼於漢曰故魏太祖曰若使無孤天下幾人稱帝幾人稱王明竊號議者觸目皆是欲以此時開四履之柞垂萬代之封必有通車三

川以闕周室介馬汾隰而逐翼侯而王司徒屢請於當時曹元首
又勤於宗室皆不知時也當時賢者是之敬則知政事時每以用
人爲先桂州蠻叛薦裴懷古鳳閣舍人缺薦魏知古右史缺薦
張思敬則天以爲知人睿宗即位嘗謂侍臣曰神龍已來李多祚
王同皎並復舊官韋月將燕欽融咸有褒贈不知更有何人尚抱
冤抑吏部尚書劉幽求對曰故鄭州刺史朱敬則往在則天朝任
正諫大夫知政事忠貞義烈爲天下所推神龍時被宗楚客冉祖
雍等誣構左授廬州刺史長安年中嘗謂臣云相王必膺期受
命當須盡節事之及韋氏篡逆干紀臣遂見危赴難翼戴興曆雖
則天誘其事亦是敬則先啓之心今陛下龍興寶位允當就戮敬
則尚銜冤泉壤未蒙昭雪況復事符先覺誠即可嘉睿宗然之贈
敬則秘書監諡曰元

楊再思鄭州原武人也少舉明經授玄武尉充使詣京師止於客
舍會盜竊其囊裝再思邂逅遇之盜者伏罪再思謂曰足下當

苦貧匱至此無行速去勿作聲恐爲他人所擒幸留公文餘財盡以仰遺盜者齎去再思初不言其事假貸以歸累遷天官員外郎歷左右肅政臺御史大夫延載初守鸞臺侍郎同鳳閣鸞臺平章事證聖初轉鳳閣侍郎依前同平章事兼太子右庶子尋遷內史自弘農縣男累封至鄭國公再思自歷事三主知政十餘年未嘗有所薦達爲人巧佞邪媚能得人主微旨主意所不欲必因而毀之主意所欲必因而譽之然恭慎畏忌未嘗忤物或謂再思曰公名高位重何爲屈折如此再思曰世路艱難直者受禍苟不如此何以全其身哉長安末昌宗旣爲法司所鞠司刑少卿相彥範斷解其職昌宗俄又抗表稱寃則天意將申理昌宗廷問宰臣曰昌宗於國有功否再思對曰昌宗往因合鍊神丹聖躬服之有効此實莫大之功則天甚悅昌宗竟以復職時人貴彥範而賤再思也時左補闕戴令言作兩腳野狐賦以譏刺之再思聞之甚怒出令言爲長社令朝士尤加嗤笑再思爲御史大夫時張易之兄司

禮少卿同休嘗奏請公卿大臣宴于司禮寺預其會者皆盡醉極
歡同休戲曰楊內史面似高麗再思欣然請剪紙自帖於巾却披
紫袍爲高麗舞縈頭舒手舉動合節滿座嗤笑又易之弟昌宗以姿
貌見寵倖再思又諛之曰人言六郎面似蓮花再思以爲蓮花似六郎
非六郎似蓮花也其傾巧取媚也如此長安四年以本官檢校京兆
府長史又遷檢校揚州大都督府長史中宗即位拜戶部尚書兼中
書令轉侍中以宮寮封鄭國公賜實封三百戶又爲冊順天皇后使
賜物五百段鞍馬稱是時武三思將誣殺王同皎再思與吏部尚書
李嶠刑部尚書韋巨源並受制考核其獄竟不能發明其枉致同皎
至死衆寃之再思俄復爲中書令吏部尚書景龍三年遷尚書右僕
射加光祿大夫其年薨贈特進并州大都督陪葬乾陵謚曰恭子植
植子獻並爲司勳員外郎再思弟昭爲考功郎中溫玉爲戶部侍郎
李懷遠邢州栢仁人也早孤貧好學善屬文有宗人欲以高蔭
相假者懷遠竟拒之退而歎曰因人之勢高士不爲假蔭求官豈

吾本志未幾應四科舉擢第累除司禮少卿出爲邢州刺史以其本鄉固辭不就改授翼州刺史俄歷揚益等州大都督府長史未行又授同州刺史在職以清簡稱入爲太子左庶子兼太子賓客歷遷右散騎常侍春官侍郎大足年遷鸞臺侍郎尋同鳳閣鸞臺平章事歲餘加銀青光祿大夫拜秋官尚書兼檢校太子左庶子賜爵平鄉縣男長安四年以老辭職聽解秋官尚書正除太子左庶子尋授太子賓客神龍初除左散騎常侍兵部尚書同中書門下三品加金紫光祿大夫進封趙郡公特賜實封三百戶俄以疾請致仕許之中宗將幸京師又令以本官知東都留守懷遠雖久居榮位而彌尚簡率園林宅室無所改作常乘款段馬左僕射豆盧欽望謂曰公榮貴如此何不買駿馬乘之荅曰此馬幸免驚蹶無假別求聞者其不歎美神龍二年八月卒中宗特賜錦被以充斂輟朝一日親爲文以祭之贈侍中謚曰成子景伯

景伯景龍中爲給事中又遷諫議大夫中宗嘗宴侍臣及朝集使

酒酣令各爲迴波辭外皆爲諂佞之辭及自要榮位次至景伯曰迴波爾時酒危微臣職在箴規侍宴旣過三爵諠譁竊恐非儀中宗不悅中書令蕭至忠稱之曰此具諫官也景雲中累遷右散騎常侍尋以老疾致仕開元中卒子彭年彭年吏才工於剖析有當時之稱開元中歷考功員外郎知舉又遷中書舍人給事中兵部侍郎天寶初又爲吏部侍郎與右相李林甫善慕山東著姓爲婚姻引就清列以大其門典銓管七年後以賊汚爲御史中丞宋渾所劾長流嶺南臨賀郡累月渾及弟恕又以賊下獄詔渾流嶺南高要郡恕流南康郡天寶十二載起彭年爲濟陰太守又遷馮翊太守入爲中書舍人給事中吏部侍郎十五載立宗幸蜀賊陷西京彭年沒於賊脅授僞官憂憤忽忽不得志與韋斌相次而卒及剋復兩京優制贈彭年爲禮部尚書

巨盧欽望京兆萬年人也曾祖通隋相州刺史南陳郡公祖寬即隋文帝之甥也大業末爲梁泉令及高祖定關中寬與郡守蕭瑀

率豪右赴京師由是累授殿中監仍詔其子懷讓尚萬春公主高祖以寬曾祖甚魏太和中例稱單姓至是改寬爲盧氏貞觀中歷遷禮部尚書左衛大將軍封芮國公永徽元年卒贈特進并州都督陪葬昭陵諡曰定又復其姓爲盧氏父仁業高宗時爲左衛將軍欽望則天時累遷司賓卿長壽二年代宗秦客爲內史時李昭德亦爲內史執權用事欽望與同時宰相韋巨源陸元方蘇味道杜景儉等並委曲從之證聖元年昭德坐事左遷涪陵尉則天以欽望等不能執正又爲司刑少卿皇甫文備奏欽望附會昭德罔上附下乃左遷欽望爲趙州刺史韋巨源自右丞爲鄜州刺史陸元方自秋官侍郎爲綏州刺史蘇味道自鳳閣侍郎爲集州刺史其年欽望入爲司禮卿遷秋官尚書封芮國公出爲河北道宣勞使俄而廬陵王復爲皇太子以欽望爲皇太子宮尹聖曆二年拜文昌右相同鳳閣鸞臺三品尋授太子賓客停知政事中宗即位以欽望官寮舊臣拜尚書左僕射知軍國重事兼檢校安國相

王府長史兼中書令知兵部事監修國史欽望作相兩朝前後十餘年張易之兄弟及武三思父子皆專權驕縱圖爲逆亂欽望獨謹其身不能有所匡正以此獲譏於代神龍二年拜開府儀同三司景龍三年五月表請乞骸不許十月卒年八十餘贈司空并州大都督諡曰元賜東園秘器陪葬乾陵則天時宰相又有張光輔史務滋崔元綜周允元等並有名績

張光輔者京兆人也少明辯有吏幹累遷司農少卿文昌右丞以討平越王貞之功拜鳳閣侍郎知政事永昌元年遷納言旬日又拜內史皆有能名其年洛州司馬房嗣業洛陽令張嗣明坐與徐蒨業弟蒨眞陰相交結蒨眞自涿所繡州逃歸將止投突厥引虜入寇途經洛下嗣業嗣明二人給其衣糧而遣之行至定州爲人所覺嗣業於獄中自縊死嗣明與蒨眞多引海內相識翼緩其死嗣明稱光輔征豫州日私說圖讖天文陰懷兩端顧望以觀成敗光輔由是被誅家口籍沒

史務滋者宣州溧陽人累至內史天授中雅州刺史劉行實及弟渠州刺史行瑜尚衣奉御行感并兄子左鷹揚將軍虔通並為侍御史來子珣誣以謀反誅又於盱眙毀其父左監門大將軍伯英棺柩初務滋素與行感周密意欲寢其反狀則天怒令俊臣鞠之務滋恐被陷刑乃自殺

崔元綜者鄭州新鄭人也祖君肅武德中黃門侍郎鴻臚卿元綜天授中累轉秋官侍郎長壽元年遷鸞臺侍郎同鳳閣鸞臺平章事元綜勤於政事每在中書必束帶至晚未嘗休偃好潔細行薰辛不歷口者二十餘年雖外示謹厚而情深刻薄每受制鞠獄必披毛求疵陷於重辟以此故人多畏而鄙之明年犯罪配流振州朝野莫不稱慶尋赦還復拜監察御史中宗時累遷尚書左丞蒲州刺史以老疾致仕晚年好攝養導引之術年九十餘卒

周允元者豫州人也弱冠舉進士延載初累轉左肅政御史中丞俄除鳳閣鸞臺平章事嘗與諸宰臣侍宴則天令各述書傳中

善言允元曰恥其君不如堯舜武三思以爲語有指斥紂而駁之則天曰聞此言足以爲誠豈特將爲過耶證聖元年卒贈貝州刺史則天爲七言詩以傷之又自繕寫時以爲榮

史臣曰王及善在孝敬東宮誠能奉職當俊臣下獄力諫除兇是憂濫及賢良而欲明彰羽翼興復之志不謂無心杜景儉五刑有濫濟活爲心四氣不和歸罪在己則天謂曰眞宰相然奈柔順李昭德不無吐剛之過也朱劼則文學有稱節行無愧諫諍果決推擇精眞苟非洞鑒古今深識王霸何由立其高論哉惜乎相不得時矣楊再思佞而取貴苟以全身掩不善而自欺謂無十日十手也李懷遠名不苟於假蔭貴不銜於故鄉無改陋居常乘劣驄亦一時之善矣然匪躬之道未之聞也且盧欽望張光輔史務滋崔元綜周允元等或有片言非無小善登于大用可謂具臣

贊曰及善奉職非無智力景儉當權不謂不賢雄文高節少連爲絕守道安貧懷遠當仁欽望之屬片善何足諂媚再思祇宜

遄速

唐書列傳卷第四十

右文林郎充兩浙東路提舉茶鹽司幹辦公事蘇之勤校勘

唐書列傳卷第四十一

劉

昉

等修

相彥範

敬暉

曾孫元膺

崔玄暉

弟昇暉子據

張柬之

子游玄孫璟

袁恕已

曾孫德文

相彥範潤州曲阿人也祖法嗣雍王府諮議叅軍弘文館學士彥範慷慨俊爽少以門蔭調補右衛翊衛聖曆初累除司衛寺主簿納言狄仁傑特相禮異嘗謂曰足下才識如是必能自致遠大尋擢授監察御史長安三年歷遷御史中丞四年轉司刑少卿時司僕卿張昌宗坐遣衛人李弘泰占已有天分御史中丞宋璟請收付制獄窮理其罪則天不許彥範上疏曰昌宗無德無才謬承恩寵自宜粉骨碎肌以荅殊造豈得苞藏禍心有此占相陛下以簪履恩久不忍先刑昌宗以逆亂罪多自招其咎此是皇天降怒非唯陛下故誅違天不祥乞陛下裁擇原其本奏以防事敗事敗即言奏訖不敗則候時爲逆此乃姦臣詭計疑惑聖心今果遂其所

謀陛下何忍不察若昌宗措此占相奏後不合更與弘泰往還尚
令修福復擬禳厄此則期於必遂元無悔心縱雖奏聞情實難恕
此而可捨誰其可刑況經兩度事彰天恩並垂捨宥昌宗自爲得
計人亦以爲應運即不勞兵甲天下皆從萬方譏之以爲陛下縱
成其亂也君在臣圖天分是爲逆臣不誅社稷亡矣伏請付鸞臺
鳳閣三司考覈其罪跡奏不報時又內史李嶠等奏稱往屬革命
之時人多逆節鞠訊決斷刑獄至嚴刻薄之吏恣行酷法其周興
丘勣來俊臣所劾破家者並請雪免彥範又奏請自文明元年已
後得罪人除楊豫博三州及諸謀逆魁首一切赦之表跡前後十
奏辭旨激切至是方見允納彥範凡所奏議若逢人主詰責則辭
色無懼爭之愈厲又嘗謂所親曰今旣躬爲大理人命所懸必不
能順旨詭辭以求苟免是歲冬則天不豫張易之與弟昌宗入閤
侍疾潛圖逆亂鳳閣侍郎張柬之與桓彥範及中臺右丞敬暉等
建策將誅之柬之遽引彥範及暉並爲左右羽林將軍委以禁兵

共圖其事時皇太子每於北門起居彥範與暉因得謁見密陳其計太子從之神龍元年正月彥範與暉及左羽林將軍李湛李多祚右羽林將軍楊元琰左威衛將軍薛思行等率左右羽林兵及千騎五百餘人討易之昌宗於宮中今李湛李多祚就東宮迎皇太子兵至玄武門彥範等奉太子斬關而入兵士大譟時則天在迎仙宮之集仙殿斬易之昌宗於廊下并就第斬其兄汴州刺史昌期司禮少卿同休並梟首於天津橋南士庶見者莫不懽叫相賀或磔割其肉一夕都盡明日太子即位彥範以功加銀青光祿大夫拜納言賜勲上柱國封譙郡公賜實封五百戶又改爲侍中從新令也彥範嘗表論時政數條其大略曰昔孔子論詩以關雎爲始言后妃者人倫之本理亂之端也故皇英降而虞道興任姒歸而姬宗盛桀奔南巢禍階未喜魯桓滅國惑以齊媛伏見陛下每臨朝聽政皇后必施帷幔坐於殿上預聞政事臣愚歷選列辟詳求往代帝王有與婦人謀及政者莫不破國亡身傾軔繼路

且以陰乘陽違天也以婦凌夫違人也違天不祥違人不義由是古
人譬以牝雞之晨惟家之索易曰無攸遂在中饋言婦人不得預
於國政也伏願陛下覽古人之言察古人之意上以社稷爲重下以
蒼生在念宜令皇后無往正殿干預外朝專在中宮聿修陰教則
坤儀式固鼎命惟永又曰臣聞京師喧喧道路籍籍皆云胡僧慧
範矯託佛教詭惑后妃故得出入禁闈撓亂時政陛下又輕騎微
行數幸其室上下媢黷有虧尊嚴臣抑嘗聞興化致理必由進善
康國寧人莫大棄惡故孔子曰執左道以亂政者殺假鬼神以危
人者殺今慧範之罪不殊於此也若不急誅必生變亂除惡務本
去邪勿疑實願天聰早加裁貶跡奏不納時有墨勅授方術人鄭
普思秘書監葉淨能國子祭酒彥範苦言其不可帝曰既要用之
無容便止彥範又對曰陛下自龍飛寶位遽下制云軍國政化皆
依貞觀故事普貞觀中嘗以魏徵虞世南顏師古爲秘書監孔穎
達爲國子祭酒至如普思等是方伎庸流豈足以比蹤前列臣恐

物議謂陛下官不擇才濫以天秩加於私愛惟陛下少加慎擇帝
竟不納時韋皇后既干朝政德靜郡王武三思又居中用事以則
天爲彥範等所廢常深憤怨又慮彥範等漸除武氏乃先事圖之
皇后韋氏既雅爲帝所信寵言無不從三思又私通於韋氏乃日
夕讒毀彥範等帝竟用三思計進封彥範爲扶陽郡王敬暉爲平
陽郡王張柬之爲漢陽郡王崔玄暉爲博陵郡王袁恕己爲南陽
郡王並加特進今罷知政事彥範仍賜姓韋氏今與皇后同屬籍
仍賜雜綵錦繡金銀鞍馬等雖外示優崇而實奪其權也易州
刺史趙履溫者即彥範之妻兄也彥範誅易之後奏言先與履溫
共謀其事於是召拜司農少卿履溫得之乃以二婢遺彥範及彥
範罷知政事履溫又脅奪其婢大爲時論所譏尋出爲洛州刺史
轉濠州刺史二年光祿卿駙馬都尉王同皎以武三思與韋氏姦
通潛謀誅之事洩爲三思誣構言同皎將廢皇后韋氏彥範等通
知其情乃貶彥範爲瀧州司馬敬暉崖州司馬袁恕己竇州司馬

崔玄暉白州司馬張柬之新州司馬並仍令長任勲封並削彥範
仍復其本姓栢氏是歲秋武三思又陰令人跡皇后穢行勝於天津
橋請加廢黜中宗聞之怒命御史大夫李承嘉推求其人承嘉希
三思言奏彥範與敬暉張柬之袁恕己崔玄暉等教人密爲此
勝雖託廢后爲名實有危君之計請加族滅制依承嘉所奏大理
丞李朝隱執奏云敬暉等既未經鞫問不可即肆誅夷請差御史
按罪待至準法處分大理卿裴談奏云敬暉等祇合據勅斷罪不
可別俟推鞫請並處斬籍沒中宗納其議仍以彥範等五人嘗賜
鐵券許以不死乃長流彥範於瀼州敬暉於崖州張柬之於隴州
袁恕己於環州崔玄暉於古州並終身禁錮子弟年十六已上者
亦配流嶺外擢授承嘉金紫光祿大夫進封襄武郡公韋氏又特
賜承嘉綵物五百段瑞錦被一張擢拜裴談爲刑部尚書左貶李
朝隱爲聞喜令三思俄又諷節愍太子抗表請夷彥範等三族中
宗以既有前命不依其請三思猶慮彥範等重被進用又納中書

舍人崔湜之計特令湜姨兄嘉州司馬周利用攝右臺侍御史就嶺外並矯制殺之彥範赴流所行至貴州利用遇之於途乃令左右執縛曳於竹槎之上肉盡至骨然後杖殺時年五十四睿宗即位延和元年並追復其官爵仍特還其子孫實封二百戶玄宗即位開元六年詔曰皇輿肇建必有輔佐之臣天步多艱爰伏經綸之業故侍中譙國公桓彥範侍中平陽郡公敬暉中書令兼吏部尚書漢陽郡公張柬之特進博陵郡公崔玄暉中書令南陽郡公袁恕已等並德惟神降材與運生道協台嶽名書識緯寅亮帝載勤勞王家叅復禹之元謀奉昇唐之景命雖殂謝易久而勲烈益彰撫彝鼎以念功想旂常而增感緬遵故實用表徽懿俾列在清廟登于明堂克申從祀之儀式茂疇庸之典並可配享中宗孝和皇帝廟庭其子弟咸加收擢建中元年重贈司徒

敬暉絳州太平人也弱冠舉明經聖曆初累除衛州刺史時河北新有突厥之寇方秋而修城不輟暉下車謂曰金湯非粟而不守

豈有弃收穫而繕城郭哉悉令罷散由是人吏咸歌詠之再遷夏
官侍郎出爲太州刺史大足元年遷洛州長史天后幸長安令暉
知副留守事在職以清幹著聞璽書勞勉賜物百段長安三年
拜中臺右丞加銀青光祿大夫神龍元年轉右羽林軍將軍以誅
張易之昌宗功加金紫光祿大夫擢拜侍中賜爵平陽郡公食實
封五百戶尋進封齊國公天后崩遺制加實封通前滿七百戶暉
等以唐室中興武氏諸王咸宜降爵上章論奏於是諸武降爲公
武三思益怒乃諷帝陽尊暉等爲郡王罷知政事仍賜鐵券恕十
死朔望趨朝初暉與彥範等誅張易之兄弟也洛州長史薛季昶
謂暉曰二凶雖除庠祿猶在請因兵勢誅武三思之屬匡正王室
以安天下暉與張柬之屢陳不可乃止季昶歎曰吾不知死所矣
翌日三思因韋后之助潛入宮中內行相事反易國政爲天下所
患時議以此歸咎於暉暉等旣失政柄受制於三思暉每推牀
嘆惋或彈指出血柬之歎曰主上疇昔爲英王時素稱勇烈五畱

諸武莫自誅鋤耳今事勢已去知復何道三思既深憤惋以許州
司功參軍鄭愔素被暉等廢黜因令上表陳其罪狀中宗詔曰
則天大聖皇后往以憂勞不豫兇豎弄權暉等因興甲兵剷除妖
孽朕錄其勞効備極寵勞自謂勲高一時遂欲權傾四海擅作威
福輕侮國章悖道并義莫斯之甚然收其薄効猶爲隱忍錫其郡
王之重優以特進之榮不謂窳窳之志殊難盈滿旣失大權多懷
怨望乃與王同皎窺覘內禁潛相謀結更欲權兵絳闕圖廢椒
宮險迹醜辭驚視駭聽屬以帝圖伊始務靜羣宰所以久爲含容
未能暴諸遐邇自同皎伏法疊跡彌彰儻若無其發明何以懲茲
悖亂迹其巨逆合寘嚴誅緣其昔立微功所以特從寬宥咸宜貶
降出佐遐藩暉可崖州司馬柬之可新州司馬恕己可賓州司馬
玄暉可白州司馬並負外置暉到崖州竟爲周利用所殺睿宗即
位追復五王官爵贈暉秦州都督諡曰肅愍建中初重贈太尉曾
孫元膺開成三年自試太子通事舍人爲河南縣丞

崔玄暉博陵安平人也父行謹爲胡蘇令本名畢以字下體有則
天祖諱乃改爲玄暉少有學行深爲叔父秘書監行功所器重龍
朔中舉明經累補庫部員外郎其母盧氏嘗誡之曰吾見姨兄屯
田郎中辛玄馭云兒子從官者有人來云貧乏不能存此是好消
息若聞貲貲充足衣馬輕肥此惡消息吾常重此言以爲確論比
見親表中仕官者多將錢物上其父母父母但知喜悅竟不問此
物從何而來必是祿俸餘資誠亦善事如其非理所得此與盜賊
何別縱無大咎獨不內媿於心孟母不受魚鮓之饋蓋爲此也汝
今坐食祿俸榮幸已多若其不能忠清何以戴天履地孔子云雖
日殺三牲之養猶爲不孝又曰父母惟其疾之憂特宜修身絮已
勿累吾此意也玄暉遵奉母氏教誠以清謹見稱尋授天官郎中
遷鳳閣舍人長安元年超拜天官侍郎每介然自守都絕請謁頗
爲執政者所忌轉文昌左丞經月餘則天謂曰自卿改職已來選
司大有罪過或聞令史乃設齋自慶此欲盛爲貪惡耳今要卿復

舊任又除天官侍郎賜雜綵七十段三年拜鸞臺侍郎同鳳閣鸞臺平章事兼太子左庶子四年遷鳳閣侍郎加銀青光祿大夫仍依舊知政事先是來俊臣周興等誣陷良善異圖爵賞因緣籍沒者數百家玄暉固陳其枉狀則天乃感悟咸從雪免則天季年宋璟劾奏張昌宗謀爲不軌玄暉亦屢有讜言則天乃令法司正斷其罪玄暉弟昇時爲司刑少卿又請寘以大辟其兄弟守正如此是時則天不豫宰相不得召見者累月及疾少間玄暉奏言皇太子相王仁明孝友足可親侍湯藥宮禁事重伏願不令異姓出入則天曰深領卿厚意尋以預誅張易之功擢拜中書令封博陵郡公中宗將授方術人鄭普思爲秘書監玄暉切諫竟不納尋進爵爲王賜實封四百戶檢校益州大都督府長史兼知都督事其後累被貶授白州司馬在道病卒建中初贈太子太師玄暉與弟昇甚相友愛諸子弟孤貧者多躬自撫養教授頗爲當時所稱昇官至尚書左丞玄暉少時頗屬詩賦晚年以爲非已所長乃不復

三十 唐傳四十一
構思唯篤志經籍述作爲事所撰行已要範十卷友義傳十卷義士傳十五卷訓注文館辭林策二十卷並行於代子璩頗以文學知名官歷中書舍人禮部侍郎璩子渙自有傳曾孫郢開成三年自商州防禦判官兼殿中侍御史入爲監察御史

張柬之字孟將襄州襄陽人也少補太學生涉獵經史尤好三禮國子祭酒令狐德棻甚重之進士擢第累補青城丞永昌元年以賢良徵試同時策者千餘人柬之獨爲當時第一擢拜監察御史聖曆初累遷鳳閣舍人時弘文館直學士王元感著論云三年之喪合三十六月柬之著論駁之曰三年之喪二十五月不刊之典也謹案春秋魯僖公三十年十二月乙巳公薨文公二年冬公子遂如齊納幣左傳曰禮也杜預注云僖公喪終此年十一月納幣在十二月士婚禮納采納徵皆有玄纁束帛諸侯則謂之納幣蓋公爲太子已行婚禮故傳稱禮也公羊傳曰納幣不書此何以書譏喪娶在三年之外何以譏三年之內不圖婚何休注云僖

公以十二月薨至此冬未滿二十五月納采問名納吉皆在三年之內故譏何休以公十二月薨至此冬十二月纔二十四月非二十五月是未三年而圖婚也案經書十二月乙巳公薨杜以長曆推乙巳是十二月十二日非書十二月是經誤文公元年四月葬我君僖公傳曰緩也諸侯五月而葬若是十二月薨即是五月不得言緩明知是十月薨故注僖公喪終此年至十二月而滿二十五月故丘明傳曰禮也據此推步杜之考校豈公羊之所能逮況丘明親受經於仲尼乎且二傳何杜所爭唯爭一月不爭一年其二十五月除喪由來無別此則春秋三年之喪二十五月之明驗也尚書伊訓云成湯既沒太甲元年惟元祀十有二月伊尹祀于先王奉嗣王祗見厥祖孔安國注云湯以元年十一月崩據此則二年十一月小祥三年十月大祥故太甲中篇云惟三祀十有二月朔伊尹以冕服奉嗣王歸于亳是十一月大祥訖十二月朔日加王冕服吉而歸亳也是孔言湯元年十二月之明驗顧命云四月哉生魄

王不懌是四月十六日也翌日乙丑王崩是十七日也丁卯命作冊度是十九日也越七日癸酉伯相命士須材是四月二十五日也則成王崩至康王麻冕黼裳中間有十日康王方始見廟則知湯崩在十一月淹停至殯訖方始十二月祇見其祖顧命見廟訖諸侯出廟門俟伊訓言祇見厥祖侯甸羣后成在則崩及見廟殷周之禮並同此周因於殷禮損益可知也不得元年以前別有一年此尚書三年之喪二十五月之明驗也禮記三年問云三年之喪二十五月而畢哀痛未盡思慕未忘然而服以是斷之者豈不送死有已復生有節又喪服四制云變而從宜故大祥鼓素琴告人以終又間傳云菽而小祥食菜果又菽而大祥有醯醬中月而禫食酒肉又喪服小記云再菽之喪三年也菽之喪二年也九月七月之喪三時也五月之喪二時也三月之喪一時也此禮記三年之喪二十五月之明驗也儀禮士虞禮云菽而小祥又菽而大祥中月而禫是月也吉祭此禮周公所制則儀禮三年之喪二十五月之明驗也此四

驗者並禮經正文或周公所制或仲尼所述吾子豈得以禮記戴聖所修輒欲排毀漢初高堂生傳禮既未周備宣帝時少傅后倉因淹中孔壁所得五十六篇著曲臺記以授弟子戴德戴聖慶博三人合以正經及孫卿所述並相符會列于學官年代已久今無端構造異論既無依據深可歎息其二十五月先儒考校唯鄭康成注儀禮中月而禫以中月間一月自死至禫凡二十七月又解禫云言澹澹然平安之意也今皆二十七月復常從鄭議也踰月入禫禫既復常則二十五月爲免喪矣二十五月二十七月其議本同竊以子之於父母喪也有終身之痛創巨者日久痛深者愈遲豈徒歲月而已乎故練而慨然蓋悲慕之懷未盡而踊擗之情已歇祥而廓然者蓋哀傷之痛已除而孤邈之念更起此皆情之所致豈外飾哉故記曰三年之喪義同過隙先王立其中制以成文理是以祥則縞帶素紕禫則無所不佩今吾子將徇情弃禮實爲乖僻夫弃縗麻之服襲錦縠之衣行道之人皆不忍也直爲節之以禮

無可奈何故由也不能過制爲姊服鯉也不能過暮哭其母夫豈
不懷懼名教逼已也若孔鄒何杜之徒並命代挺生範模來裔官
牆積仞未易可窺但鑽仰不休當漸入勝境詎勞終年矻矻虛肆
莠言請所有掎擿先儒願且以時消息時人以柬之所駁頗合
於禮典是歲突厥默啜表言有女請和親則天盛意許之欲令
淮陽郡王延秀娶之柬之奏曰自古無天子求娶夷狄女以配中國
王者表入頗忤其言神功初出爲合州刺史尋轉蜀州刺史舊例
每歲老兵募五百人往姚州鎮守路越山險死者甚多柬之表論
其弊曰臣竊按姚州者古哀牢之舊國絕域荒外山高水深自生
人已來泊於後漢不與中國交通前漢唐蒙開夜郎滇苴而哀
牢不附至光武季年始請內屬漢置永昌郡以統理之乃收其
鹽布羶窳之稅以利中土其國西通大秦南通交趾奇珍異寶進
貢歲時不闕劉備據有巴蜀常以甲兵不充及備死諸葛亮五月
渡瀘收其金銀鹽布以益軍儲使張伯岐選其勁卒搜兵以增武

備故蜀志稱自亮南征之後國以富饒甲兵充足由此言之則前
代置郡其利頗深今鹽布之稅不供珍奇之貢不入戈戟之用不
實於戎行寶貨之資不輸於八國而空竭府庫驅率平人受役蠻
夷肝腦塗地臣竊爲國家惜之昔漢以得利旣多歷博南山涉蘭
倉水更置博南哀牢二縣蜀人愁怨行者作歌曰歷博南越蘭津
渡蘭倉爲他人蓋譏漢貪珍奇鹽布之利而爲蠻夷之所驅役也
漢獲其利人且怨歌今減耗國儲費用日廣而使陛下之赤子身
膏野草骸骨不歸老母幼子哀號望祭於千里之外於國家無
絲髮之利在百姓受終身之酷臣竊爲國家痛之往者諸葛亮破
南中使其渠率自相統領不置漢官亦不留兵鎮守人間其故亮
言置官留兵有三不易大意以置官吏漢雜居猜嫌必起留兵運
糧爲患更重忽若反叛勞費更多但粗設紀綱自然安定臣竊以
亮之此策妙得羈縻蠻夷之術今姚府所置之官旣無安邊靜寇
之心又無葛亮且縱且擒之伎唯知詭謀狡筭恣情割剥貪叨劫

掠積以爲常扇動酋渠遣成朋黨折支諂笑取媚蠻夷拜跪趨
伏無復慙恥提挈子弟嘯引凶愚聚會蒲博一擲累萬劍南遁
中原亡命有二千餘戶見散在彼州專以掠奪爲業姚州本龍
朔中武陵縣主簿石子仁奏置之後長史李孝護平文協並爲羣
蠻所殺前朝遣郎將趙武貴討擊貴及蜀兵應時破敗噍類無
遺又使將軍李義愬等往征郎將劉惠基在陣戰死其州乃廢
臣竊以諸葛亮稱置官留兵有三不易其言乃驗至垂拱四年蠻
郎將王善寶昆州刺史麋軋福又請置州奏言所有課稅自出
姚府管內更不勞擾蜀中及置州後錄事參軍李稜爲蠻所殺延
載中司馬成琛奏請於瀘南置鎮七所遣蜀兵防守自此蜀中搔
擾于今不息且姚府愬管五十七州巨猾遊客不可勝數國家設
官分職本以化俗防姦無恥無厭狼籍至此今不問夷夏負罪並
深見道路刼殺不能禁止恐一旦驚擾爲禍轉大伏乞省罷姚州
使隸舊府歲時朝覲同之蕃國瀘南諸鎮亦皆悉廢於瀘北置關

百姓自非奉使入蕃不許交通往來增舊府兵選擇清良宰牧以
統理之臣愚將爲穩便疏奏則天不納後累拜荊州大都督府長
史長安中召爲司刑少卿遷秋官侍郎時夏官尚書姚崇爲靈武
軍使將行則天令舉外司堪爲宰相者崇對曰張柬之既厚有謀
能斷大事且其年老惟陛下急用之則天登時召見尋同鳳閣
鸞臺平章事未幾遷鳳閣侍郎仍知政事及誅張易之兄弟柬
之首謀其事中宗即位以功擢拜天官尚書鳳閣鸞臺三品封漢
陽郡公食實封五百戶未幾遷中書令監修國史月餘進封漢陽
郡王加授特進令罷知政事其年秋柬之表請歸襄州養疾許之
仍特授襄州刺史又拜其子疇爲著作郎令隨父之任上親賦詩
祖道又令羣公餞送於定鼎門外柬之至襄州有鄉親舊交抵罪
者必深文致法無所縱捨其子疇恃以立功母見諸少長不以禮
接時議以爲不能易荆楚之剽性焉尋爲武三思所構貶授新州
司馬柬之至新州憤恚而卒年八十餘景雲元年制曰褒德紀功

事華典冊飾終追遠理光名教故吏部尚書張柬之翼戴興運謨
明帝道經綸謬諤風軌猶存往屬回邪構成疊咎無辜放逐淪沒
荒遐言念勲賢良深軫悼宜加寵贈式賁幽泉可贈中書令封漢
陽郡公建中初又贈司徒立孫璟開成三年自宜城尉遷壽安尉
袁恕已滄州東光人也長安中歷遷司刑少卿兼知相王府司馬
事劾暉等將誅張易之兄弟恕已預其謀議又從相王統率南衙
兵仗以備非常及事定加銀青光祿大夫行中書侍郎同中書門
下三品封南陽郡公食實封五百戶將作少匠楊務廉素以工巧
見用中興初恕已恐其更啓遊娛侈靡之端言於中宗曰務廉致
位九卿積有歲年苦言嘉謀無足可紀每宮室營構必務其侈若
不斥之何以廣昭聖德由是左授務廉陵州刺史恕已俄擢拜中
書令仍加特進封南陽郡王罷知政事則天崩遺制加實封滿七
百戶後與劾暉等累遭貶黜流于環州尋爲周利用所逼飲野葛
汁數升恕已常服黃金飲毒發憤悶以手掘地取土而食爪甲

殆盡音不死乃擊殺之建中初贈太子太傅曾孫德文舉進士開成三年授秘書省校書郎

史臣曰昔夫老入越勾踐保於會稽不聽子胥之言而有甬東之歎此五王除兇返正得計成功當是時彥範勒暉握兵全勢三思攸暨其黨半殲若從季昶之言寧有利用之禍蓋以心懷不忍遽失後圖黜削流移理固然也且蔓蔓而不能拔本建謀而尚欠防微死即無辜禍由自擢失斷召亂也不亦宜哉

贊曰嗟彼五王忠于有唐知火在木謂無其傷禍發既剋勢摧靡當何事不敵周身之防

唐書列傳卷第四十一

右文林郎充兩浙東路提舉茶鹽司幹辦公事蘇之勤校勘



唐書列傳卷第四十二

劉

昉

魏元忠

韋安石

子陟號斌子昉從父元子抗從祖兄子巨源趙唐郡附

蕭肅至忠

宗楚客紀庚納附

魏元忠宋州宋城人也本名真宰以避則天母號改焉初爲太學生志氣倜儻不以舉薦爲意累年不調時有左史熱蓋屋人江融撰九州設險圖備載古今用兵成敗之事元忠就傳其術儀鳳中吐蕃頻犯塞元忠赴洛陽上封事言命將用兵之工拙曰臣聞理天下之柄二事焉文與武也然則文武之道雖有二門至於制勝御人其歸一揆方今王略遐宣皇威遠振建禮樂而陶士庶訓軍旅而惛生靈然論武者以弓馬爲先而不稽之以權略談文者以篇章爲首而不問之以經綸而奔競相因遂成浮俗臣嘗讀魏晉史每鄙何晏王衍終日談空近觀齊梁書才士亦復不少並何益於理亂哉從此而言則陸士衡著辯亡論而不救河橋之敗養由基射能

穿札而不止鄢陵之奔斷可知矣昔趙岐撰禦寇之論山濤陳用兵之本皆坐運帷幄暗合孫吳宜尼稱有德者必有言仁者必有勇則何平叔王夷甫豈得同日而言哉臣聞才生於代代實須才何代而不生才何才而不生代故物有不求末有無物之歲士有不用末有無士之時夫有志之士在富貴之與貧賤皆思立於功名冀傳芳於竹帛故班超投筆而歎祖逖擊楫而誓此皆有其才而申其用矣且知己難逢英哲罕遇士之懷琬琰以就埃塵抱棟梁而困溝壑者則悠悠之流直觀此士之貧賤安知此士之方略哉故漢拜韓信舉軍臨笑蜀用魏延羣臣舐望嗟乎富貴者易爲善貧賤者難爲工至於此也亦有位處立功之際而不展其志略身爲時主所知音不能盡其才用則貧賤之士焉足道哉漢文帝時魏尚李廣並身任邊將位爲郡守文帝不知魏尚之賢而囚之不知李廣之才而不能用之常歎李廣恨生不逢時今當高祖曰萬戶侯豈足道哉夫以李廣才氣天下無雙匈奴畏之號爲飛將

爾時胡騎憑凌足伸其用文帝不能大任反歎其生不逢時近不知魏尚李廣之賢而乃遠想廉頗李牧故馮唐曰雖有頗牧而不能用近之矣從此言之疎斥賈誼復何怪哉此則身爲時主所知竟不能盡其才用昔羊祜獻計平吳賈充荀勗沮其策祜歎曰天下不如意恒十居七八緣荀賈不同竟不大舉此則位處立功之際而不得展其志略而布衣韋帶之人懷一奇抱一策上書闕下朝進而望夕召何可得哉臣請歷訪内外文武職事五品已上得不有智計如羊祜武藝如李廣在用與不用之間不得騁其才略伏願降寬大之詔使各言其志無今級黜直氣卧死於淮陽仲舒大才位屈於諸侯相又曰臣聞帝王之道務崇經略經略之術必仗英奇自國家良將可得言矣李靖破突厥侯君集滅高昌蘇定方開西域李勣平遼東雖奉國威靈亦其才力所致古語有之人無常俗政有理亂兵無強弱將有能否由此觀之安邊境立功名在於良將也故趙充國征先零馮子明討南羌皆計不空施機不虛

發則良將立功之驗也然兵革之用王者大事存亡所繫若任得其才則摧兇而扼暴苟非其任則敗國而殄人北齊段孝立六持大兵者如擎盤水傾在俛仰間一致蹉跌求止豈得哉從此而言周亞夫堅壁以挫吳楚司馬懿閉營而困葛亮俱爲上策此皆不戰而却敵全軍以制勝是知大將臨戎以智爲本漢高之英雄大度尚曰吾寧關智魏武之機神冠絕猶依法孫吳假有項籍之氣袁紹之基而皆泯智任情終以破滅何況復出其下哉且上智下愚明暗異等多寡少欲衆寡殊科故魏用栢直以拒漢韓信輕爲聚子燕任慕容評以抗秦王猛謂之奴才即栢直慕容評智勇俱亡者也夫中材之人素無智略一旦居元帥之任而意氣軒昂自謂當其鋒者無不摧碎豈知戎昭果毅敦詩悅禮之事乎故李信求以二十萬衆獨舉鄢郢其後果辱秦軍樊噲願得十萬衆橫行匈奴登時見折季布皆其事也當今朝廷用人類取將門子弟亦有死事之家而蒙拙擢者此等本非幹略見知雖竭力盡誠亦不免

於傾敗若之何使當關外之任哉後漢馬賢討西羌皇甫規陳其
必敗宋文帝使王玄謨收復河南沈慶之懸知不剋謝玄以書生
之姿拒符堅天下之衆郝超明其必勝相溫提數萬之兵萬里而
襲成都劉直長期於使取雖時有今古人事皆可推之取驗大體
觀其銳之與識略耳明者隨分而察成敗之形昭然自露京房有
言後之視今亦猶今之視古則昔賢之與今哲意況何殊當事機
之際也皆隨時而立功豈復取賢於往代待才於未來也即論知
與不知用與不用夫建功者言其所濟不言所起言其所能不言
所藉若陳湯呂蒙馬隆孟觀並出自貧賤敷濟其高未聞其家代
爲將帥董仲舒曰爲政之用譬之琴瑟不調甚者必解絃而更張
之乃可鼓也故陰陽不和擢士爲相繼夷不龔拔卒爲將即更張
之義也以四海之廣億兆之衆其中豈無卓越奇絕之士臣恐未
之思也夫何遠之有又曰臣聞賞者禮之基罰者刑之本故禮崇
謀夫竭其能賞厚義士輕其死刑正君子勗其心罰重小人懲其

過然則賞罰者軍國之綱紀政教之藥石綱紀舉而衆務自理藥石行而文武用命彼吐蕃蟻結蜂聚本非勅敵薛仁貴郭待封受關外之寄奉命專征不能激勵熊羆乘機掃撲敗軍之後又不能轉禍爲福因事立功遂乃棄甲喪師脫身而走幸逢寬政罪止削除國家網漏吞舟何以過此天皇遲念舊恩收其後效當今朝廷所少豈此三人乎且賞只不勸謂之止善罰不懲謂之縱惡仁貴自宜力海東功無尺寸坐玩金帛瀆貨無厭今又不誅縱惡更甚臣以疎賤干非其事豈欲間天皇之君臣生厚薄於仁貴直以刑賞一虧百年不復區區所懷實在於此古人古國無賞罰雖堯舜不能爲化今罰不能行賞亦難信故人間議者皆言近日征行虛有賞格而無其事良由中才之人不識大體恐賞賜勲庸傾竭倉庫留意錐刀將此益國徇目前之近利忘經久之遠圖所謂錯之毫釐失之千里者也且黔首雖微不可欺以得志瞻望恩澤必因事而生心既有所因須應之以實豈得懸不信之令設虛賞之科比

者師出無功未必不由於此文子曰同言而信信在言前同令而行誠在令外故商君移木以表信曹公割髮以明法豈禮也哉有由然也自蘇定方定遼東李勣破平壤賞絕不行勳仍淹滯數年紛紜真偽相雜縱加沙汰未至澄清臣以吏不奉法慢自京師僞勳所由主司之過其則不遠近在尚書省中不聞斬一臺郎戮一令史使天下知聞天皇何能照遠而不照近哉神州化首萬國共尊文昌政本四方是則軌物宜風理亂攸在臣是以披露不已冒死盡言且明鏡所以照形往事所以知今臣識不稽古請以近事言之貞觀年中萬年縣尉司馬立景舞文飾智以邀乾沒太宗審其姦詐棄之都市及征高麗也揔管張君入擊賊不進斬之旗下臣以僞勳之罪多於立景仁貴等敗重於君入向使早誅薛仁貴郭待封則自餘諸將豈敢失利於後哉韓子云慈父多敗子嚴家無格虜此言雖小可以喻大公孫弘有言人主病不廣大人臣病不節儉臣恐天皇病之於不廣大過在於慈父斯亦日月之一蝕也又

今之將吏率多貪暴所務唯口馬所求唯財物無趙奢吳起散金養士之風縱使行軍悉是此屬臣恐吐蕃之平未可旦夕望也帝甚歎異之授秘書省正字令直中書省仗內供奉尋除監察御史文明年遷殿中侍御史其年徐敬業據揚州作亂左玉鈐衛大將軍李孝逸督軍討之則天詔元忠監其軍事孝逸至臨淮而偏將雷仁智爲敬業先鋒所敗敬業又攻陷潤州迴兵以拒孝逸孝逸懼其鋒按甲不敢進元忠謂孝逸曰朝廷以公王室懿親故委以閫外之事天下安危實資一決且海內承平日久忽聞狂狡莫不注心傾耳以俟其誅今大軍留而不進則解遠近之望萬一朝廷更命他將代公其將何辭以逃逗撓之罪幸速進兵以立大效不然則禍難至矣孝逸然其言乃部勒士卒以圖進發時敬業屯於下阿谿敬業弟敬猷率偏師以逼淮陰元忠請先擊敬猷諸將咸曰不如先攻敬業敬業敗則敬猷不戰而擒矣若擊敬猷則敬業引兵救之是腹背受敵也元忠曰不然賊之勁兵精卒盡在下阿

蟻聚而來利在一決萬一失捷則大事去矣敬猷本出博徒不習戰
鬪其衆寡弱人情易搖大軍臨之其勢必剋既剋敬猷我軍乘勝
而進彼若引救惟陰計程則不及又恐我之進掩江都必邀我於
中路彼則勞倦我則以逸待之破之必矣譬之逐獸弱者先擒豈
可捨必擒之弱獸趨勢敵之強兵恐未可也孝逸從之乃引兵擊
敬猷一戰而破之敬猷脫身而遁孝逸乃進軍與敬業隔溪相拒
前軍摠管蘇孝祥爲賊所破孝逸又懼欲引退初敬業至下阿有
流星墜其營及是有羣鳥飛噪於陣上元忠曰驗此即賊敗之兆
也風順荻乾火攻之利固請使戰乃平敬業元忠以功擢司刑正
稍遷洛陽令尋陷周興獄詣市將刑則天以元忠有討平敬業功
特免死配涑貴州時承勅者將至市先令傳呼監刑者遽釋元忠
令起元忠曰未知勅虛實豈可造次徐待宣勅然始起謝觀者咸
歎其臨刑而神色不撓聖曆元年召授侍御史擢拜御史中丞又
爲來俊臣侯思止所陷再被流于嶺表復還授御史中丞元忠前

後三被流於時人多稱其無罪則天嘗謂曰卿累負謗鑠何也對曰臣猶鹿也羅織之徒有如獵者苟須臣肉作羹耳此輩殺臣以求達臣復何辜聖曆二年擢拜鳳閣侍郎同鳳閣鸞臺平章事檢校并州長史未幾加銀青光祿大夫遷左肅政臺御史大夫兼檢校洛州長史政號清嚴長安中相王爲并州元帥元忠爲副時奉宸令張易之嘗縱其家奴凌暴百姓元忠笞殺之權豪莫不劾憚時突厥與吐蕃數犯塞元忠皆爲大撻管拒之元忠在軍唯持重自守竟無所剋獲然亦未嘗敗失中宗在春坊時元忠檢校太子左庶子時張易之昌宗權寵日盛傾朝附之元忠嘗奏則天曰臣承先帝顧眄受陛下厚恩不徇忠死節使小人得在君側臣之罪也則天不悅易之昌宗由是含怒因則天不豫乃譖元忠與司禮丞高戢潛謀曰主上老矣吾屬當挾太子而令天下則天惑其言乃下元忠詔獄召太子相王及諸宰相令昌宗與元忠等殿前參對反復不使昌宗又引鳳閣舍人張說令執證元忠說初僞許

之及則天召說驗問說確稱元忠實無此語則天乃悟元忠被誣然以昌宗之故特貶授端州高要尉中宗即位其日驛召元忠授衛尉卿同中書門下三品旬日又遷兵部尚書知政事如故尋進拜侍中兼檢校兵部尚書時則天崩中宗居諒闇多不視事軍國大政獨委元忠者數日未幾遷中書令加授光祿大夫累封齊國公監修國史神龍二年元忠與武三思祝欽明徐彥伯柳仲韋承慶崔融岑羲徐堅等撰則天皇后實錄二十卷編次文集二百二十卷奏之中宗稱善賜元忠物千段仍封其子衛王府諮議叅軍昇爲任城縣男時元忠特承寵榮當朝用事初元忠作相於則天朝議者以爲公清至是再居政事天下莫不延首傾屬冀有所弘益元忠乃親附權豪抑棄寒俊竟不能賞善罰惡勉修時政議者以此少之四年秋代唐璟爲尚書右僕射兼中書令仍知兵部尚書事監修國史未幾元忠請歸鄉拜掃特賜錦袍一領銀千兩并給千騎四人充其左右手勅曰衣錦晝遊在乎茲日散金敷惠諒屬斯辰

元忠至鄉里竟自藏其銀無所賑施及還帝又幸白馬寺以迎勞之其恩遇如此是時安樂公主嘗私請廢節愍太子立己爲皇太女中宗以問元忠元忠固稱不可乃止尋遷左僕射餘並如故元忠又嫉武三思專權用事心常憤歎思欲誅之三年秋節愍太子起兵誅三思元忠及左羽林大將軍李多祚等皆潛預其事太子既斬三思又率兵詣闕將請廢韋后爲庶人遇元忠子太僕少卿昇於永安門脅令從已太子兵至玄武樓下多祚等猶豫不戰元忠又持兩端由是不剋昇爲亂兵所殺中宗以元忠有平寇之功又素爲高宗天后所禮遇竟不以昇爲累委任如初是時三思之黨兵部尚書宗楚客與侍中紀處訥等又執證元忠及昇云素與節愍太子同謀構逆請夷其三族中宗不許元忠懼不自安上表固請致仕手制聽解左僕射以特進齊國公致仕于家仍朝朔望楚客等又引右衛郎將姚庭筠爲御史中丞令劾奏元忠由是貶渠州員外司馬侍中楊再思中書令李嶠皆依楚客之旨以致元

忠之罪唯中書侍郎蕭至忠正議去當從寬宥有楚客大怒又遣給事中冉祖雍與楊再思奏言元忠旣緣犯逆不合更授內地官遂左遷思州務川尉頃之楚客又令御史袁守素奏言則天昔在三陽宮不豫內史狄仁傑奏請陛下監國元忠密進狀云不可據此則知元忠懷逆日久伏請加以嚴誅中宗謂楊再思等曰以朕思之此是守大錯人臣事主必在心豈有主上少有不安即請太子知事乃是狄仁傑樹私惠未見元忠有失守一假借前事羅織元忠豈是道理楚客等遂止元忠行至涪陵而卒年七十餘景龍四年追贈尚書左僕射齊國公本州刺史仍令所司給靈輿送至鄉里睿宗即位制令陪葬定陵景雲三年又降制曰故左僕射齊國公魏元忠代洽人望時稱國良歷事三朝俱展誠效晚年遷謫頗非其罪宜特還其子著作郎晃實封百戶開元六年謚曰貞子昇晃韋安石京兆萬年人周大司空卽國公孝寬曾孫也祖津大業末爲民部侍郎煬帝之幸江都勅津與段達元文都等於洛陽留守

仍檢校民部尚書事李密逼東都津拒戰於上東門外兵敗爲密所囚及王世充殺文都等津獨免其難密敗歸東郡世充僭號深被委遇及洛陽平高祖與津有舊徵授諫議大夫檢校黃門侍郎出爲陵州刺史卒父琬成州刺史叔琨戶部侍郎琨弟遂倉部負外安石應明經舉累授乾祐尉蘇良嗣甚禮之永昌元年三遷雍州司兵良嗣時爲文昌左相謂安石曰大材須大用何爲徒勞於州縣也特薦於則天擢拜膳部員外郎永昌令并州司馬則天手制勞之曰聞卿在彼庶事存心善政表於能官仁明彰於鎮撫如此稱職深慰朕懷俄拜并州刺史又歷德鄭二州刺史安石性持重少言笑爲政清嚴所在人吏咸畏憚之久視年遷文昌右丞尋拜鸞臺侍郎同鳳閣鸞臺平章事兼太子左庶子長安三年爲神都留守兼判天官秋官二尚書事後與崔神慶等同爲侍讀尋知納言事是歲又加檢校中臺左丞兼太子左庶子鳳閣鸞臺三品如故時張易之兄弟及武三思皆恃寵用權安石數折辱之甚爲

易之等所忌嘗於內殿賜宴易之引蜀商宋霸子等數人於前博戲安石跪奏曰蜀商等賤類不合預登此筵因顧左右令逐出之座者皆爲失色則天以安石辭直深慰勉之時鳳閣侍郎陸元方在座退而告人曰此真宰相非吾等所及也則天嘗幸興秦宮欲就捷路安石奏曰千金之子且有垂堂之誠萬乘之尊不宜輕乘危險此路板築初成無自然之固鑿駕經之臣等敢不請罪則天登時爲之迴輦安石俄又舉奏易之等罪狀初有勅付安石及夏官尚書唐休璟推問未竟而事變四年出爲揚州大都督府長史神龍初徵拜刑部尚書是歲又遷吏部尚書復知政事俄代張柬之爲中書令封鄖國公以嘗爲官寮賜實封三百戶又兼相王府長史俄轉戶部尚書復爲侍中監修國史中宗與庶人嘗因正月十五日夜幸其第賜賚不可勝數又中宗嘗幸安樂公主城西池館公主具舟楫請御樓船安石諫曰御輕舟乘不測臣恐非帝王之事乃止睿宗踐祚拜太子少保改封鄖國公俄又歷侍中中書

今景雲二年加開府儀同三司時太平公主與竇懷貞等潛有異圖將引安石預其事公主屢使子壻唐暎邀安石至宅安石竟拒而不往睿宗嘗密召安石謂曰聞朝廷傾心東宮卿何不察也安石對曰陛下何得亡國之言此必太平之計太子有大功於社稷仁明孝友天下所稱願陛下無信讒言以致惑也睿宗瞿然曰朕知之矣卿勿言也太平於簾中竊聽之乃構飛語欲令鞠之賴郭元振保護獲免俄而遷尚書左僕射兼太子賓客依舊同中書門下三品雖假以崇寵實去其權其冬罷知政事拜特進充東都留守太常主簿李元澄即安石之子壻其妻病死安石夫人薛氏疑元澄先所幸婢厭殺之其婢久已轉嫁薛氏使人捕而捶之致死由是為御史中丞楊茂謙所劾出為蒲州刺史無幾轉青州刺史安石初在蒲州時太常卿姜皎有所請託安石拒之皎大怒開元二年皎弟晦為御史中丞以安石等作相時同受中宗遺制宗楚客韋溫削除相王輔政之辭安石不能正其事令侍御史洪子興舉

劾之子輿以事經赦令固稱不可監察御史郭震希皎等意越次奏之於是下詔曰青州刺史韋安石太子賓客韋嗣立刑部尚書趙彥昭等往在先朝曲蒙厚賞因緣幸會久在廟堂朋黨比周聞於行路景龍之末長蛇縱禍蒼卒之間人神憤怨未聞捨生取義直道昌言遂削太上皇輔政之辭用韋氏臨朝之策比常隱忍復以崇班將其愧畏稍懲前惡而尚款回邪苟安榮寵宜從謫官之典以勵事君之節安石可沔州別駕嗣立可嶽州別駕彥昭可袁州別駕並負外置安石既至沔州晦又奏云安石嘗檢校定陵造作隱官物入已勅符下州徵賦安石歎曰此祇應須我死耳憤激而卒年六十四開元十七年贈蒲州刺史天寶初以子貴追贈開府儀同三司尚書左僕射郇國公諡曰文貞二子陟斌並早知名陟字躬卿代爲關中著姓人物衣冠弁世榮盛安石晚有子及爲并州司馬始生陟及斌俱少聰敏頗異常童陟自幼風標整峻獨立不羣安石尤愛之神龍二年安石爲中書令陟始十歲拜溫王

府東閣祭酒加朝散大夫累遷秘書太常丞有文彩善隸書辭人
秀士已遊其門矣開元初丁父憂居喪過禮自此杜門不出八年
與弟斌相勸勵探討典墳不捨晝夜文華當代俱有盛名于時才
名之士王維崔顥盧象等常與陟唱和遊處廣平宋公見陟數曰
盛德遺範盡在是矣歷洛陽令轉吏部郎中張九齡一代辭宗爲
中書令引陟爲中書舍人與孫逖梁陟對掌文誥時人以爲美談
後爲禮部侍郎陟好接後輩尤鑒于文雖辭人後生靡不諳練曩
者主司取與皆以一場之善登其科目不盡其才陟先責舊仍令舉
人自通所工詩筆先試一日知其所長然後依常式考覈片善無遺
美聲盈路後爲吏部侍郎常病選人冒名接脚闕負旣少取士良
難正調者被擠僞集者冒進陟剛腸嫉惡風彩嚴正選人疑其有
瑕案聲盤詰無不首伏每歲皆贖得數百負闕以待淹滯常謂所
親曰使陟知銓衡二年則無人可選矣陟門地豪華早踐清列
侍兒閹閹列侍左右者十數衣書藥食咸有典掌而輿馬僮奴勢

侔於王家主第自以才地人物坐取三公頗以簡貴自處善誘納後進其同列朝要視之蔑如也如道義相知靡隔貴賤而布衣韋帶之士恒虛席倒屣以迎之時人以此稱重李林甫忌之出爲襄陽太守兼本道採訪使又改陳留採訪使復加銀青光祿大夫天寶中襲封郇國公以親累貶鍾離太守重貶義陽太守尋移河東太守充本道採訪使十二年入考在華清宮右相楊國忠惡其才望恐踐台衡乃引河東人吳象之謂曰子能使人告陟乎吾以子爲御史象之曰能乃告陟與御史中丞吉溫結託欲謀陷朝廷又誘陟姪韋元志證之陟坐貶爲桂州桂嶺尉未之任再貶昭州平樂尉會祿山反陷洛陽陟憂弟斌爲賊所得國忠欲構陟與賊通應潛令吏卒伺其所居欲脅之令陟憂死其主豪人勸陟曰昔張燕公竄迹藏於陳氏以免危亡詔命儻來誰敢申覆未若輕舟千里且泛谿洞候事清徐出豈不美也陟慨然應之曰我積信於國朝非一代也況素所秉心無負神理命之合爾其敢逃刑燕公之謀

誠媿厚意不能從也因謝遣之乃堅卧不動經歲餘潼關失守肅宗即位於靈武起爲吳郡太守兼江南東道採訪使未到郡肅宗使中官賈遊巖手詔追之未至鳳翔會江東永王擅起兵令陟招諭除御史大夫兼江東節度使陟以季廣琛從永王下江非其本意懼罪出奔未有所適乃有表請拜廣琛爲丹陽太守兼御史中丞緣江防禦使以安反側因與淮南節度使高適淮南節度使來瑱等同至安州陟謂適瑒曰今中原未復江淮動搖人心安危實在茲日若不齊盟質信以示四方令知三帥協心萬里同力則難以集事矣陟推瑒爲地主乃爲載書登壇誓衆曰淮西節度使兼御史大夫瑒江東節度使御史大夫陟淮南節度使御史大夫適等銜國威命各鎮方隅糾合三垂剪除兇慝好惡同之無有異志有偷此盟隊命亡族皇天后土祖宗神明實鑒斯言陟等辭旨慷慨血淚俱下三軍感激莫不隕泣其後江表樹碑以紀忠烈無何有詔令陟赴行在陟以廣琛雖承恩命猶且遲迴恐後變生禍

貽於陟欲往招慰然後赴徵乃發使上表懇言其急陟馳至歷陽見廣琛且宣恩旨勞徠行賞陟自以私馬數匹賜之安其疑懼即日便赴行在謁見肅宗肅宗深器之拜御史大夫拾遺杜甫上表論房琯有大臣度真宰相器聖朝不容辭旨近誕肅宗令崔光遠與陟及憲部尚書顏真卿同訊之陟因入奏曰杜甫所論房琯事雖被貶黜不失諫臣大體上由此踈之時朝臣立班多不整肅至有班頭相弔哭者乃罷陟御史大夫顏真卿代授吏部尚書自後任事寵臣皆後來初用望風畏忌道竟不行因宗人伐墓栢坐不能禁出爲絳州刺史乾元二年入爲太常卿呂諲再入相薦爲禮部尚書東京留守判尚書省事兼東京畿觀察處置等使逆賊史思明寇逼河洛副元帥李光弼議守河陽令陟率東京官屬入關迴避乃領兵守陝州有詔遷吏部尚書留守如故今止於永樂不許至京候光弼收復河洛令陟依前居守陟早有台輔之望間被李林甫楊國忠所擠及中原兵起天下事殷陟常自謂負經緯之器

遭後生騰謗明主見疑常鬱鬱不得志乃歎曰吾道窮於此乎有志不伸得非天命乎因避疾上元元年八月卒於號州時年六十五贈荊州大都督永泰元年詔曰竭忠之臣歿不廢命奉上之節行固無私言念節終抑惟恒典故金紫光祿大夫吏部尚書兼御史大夫充東京留守兼判留司尚書省事東京畿觀察處置使上柱國郇國公韋陟敦敏直方端嚴峻整弘敷典禮表正人倫學冠通儒文含大雅頃者詢謨舊德保救屢成周眷彼郊圻資其稱固而兇胡殘醜密邇河洛命居陝號時俟翦除纔加喉舌之榮遽嬰霜露之疾方期克享眉壽冀其有瘳奄此殂歿良深震悼昇車而復以申三極之恩在牖加紳宜崇八座之寵可贈尚書左僕射太常博士程皓議謚爲忠孝刑部尚書顏真卿以爲忠則以身許國見危致命孝則晨昏色養取樂庭闈不合三行殊高以成忠孝主客負外郎歸崇勸又駁之紛議不已右僕射郭英乂不達其體請從太常之狀而奏陟子允

斌景雲初安石爲宰輔時授太子通事舍人早修整尚文藝容止嚴厲有大臣體與兄陟齊名開元十七年司徒薛王業爲女平恩縣主求婚以斌才地奏配焉遷秘書丞天寶初轉國子司業徐安貞王維崔顥當代辭人特爲推挹天寶中拜中書舍人兼集賢院學士兄陟先爲中書舍人未幾遷禮部侍郎陟在南省斌又掌文誥改太常少卿天寶五載右相李林甫構陷刑部尚書韋堅斌以親累貶巴陵太守移臨安太守加銀青光祿大夫斌授五品時兄陟爲河東太守堂兄由爲右金吾將軍縉爲太子少師四人同時列戟衣冠之盛罕有其比十四載安祿山反陷洛陽斌爲賊所得僞授黃門侍郎憂憤而卒及剋復兩京肅宗乾元元年贈秘書監安石兄叔夏別有傳從父兄子抗從祖兄子巨源抗弱冠舉明經累轉吏部郎中以清謹著稱景雲初爲永昌令不務威刑而政令肅一都輦繁劇前後爲政寬猛得中無如抗者無幾遷右臺御史中丞人吏詣闕請留不許因立碑於通衢紀其遺惠開元三年自左

庶子出爲益州長史四年入爲黃門侍郎八年河曲叛胡康待賓擁徒作亂詔抗持節慰撫抗素無武略不爲寇所憚在路遲留不敢進因墜馬稱疾竟不至賊所而還俄以本官檢校鴻臚卿代王駿爲御史大夫兼按察京畿時抗弟拯爲萬年令兄弟同領本部時人榮之尋以薦御史非其人出爲安州都督轉蒲州刺史十年入爲大理卿其年代陸象先爲刑部尚書尋又分掌吏部選事十四年卒抗歷職以清儉自守不務產業及終喪事殆不能給玄宗聞其貧特令給靈輦遞送還鄉贈太子少傅謚曰貞抗爲京畿按察使時舉奉天尉梁昇卿新豐尉王倕金城尉王冰華原尉王燾爲判官及支使其後昇卿等皆名位通顯時人以抗有知人之鑒

巨源周京兆尹摠曾孫也祖臣伯襲祖爵鄭國公入隋改封舒國公官至尚衣奉御巨源則天時累遷司賓少卿轉司府卿文昌右丞同鳳閣鸞臺平章事三年轉夏官侍郎依前平章事有吏才勾覆省內文案下符剝徭雖爲下所怨苦然亦頗收其利謚聖初出

爲鄜州刺史尋拜地官尚書神都留守長安二年詔入轉刑部尚書又加太子賓客再爲神都留守神龍初入拜工部尚書封同安縣子又遷吏部尚書同中書門下三品進封郾縣伯時安石爲中書令以是巨源近屬罷知政事巨源尋遷侍中中書令進封舒國公附入韋后三等親敘爲兄弟編在屬籍是歲巨源奉制與唐休璟李懷遠祝欽明蘇瓌等定垂拱格及格後勅前後計二十卷頒下施行時武三思先有實封數千戶在貝州時屬大水刺史宋璟議稱租庸及封丁並合捐免巨源以爲穀稼雖被湮沉其蠶桑見在可勒輸庸調由是河朔戶口頗多流散景龍二年順天翊聖皇后衣箱中裙上有五色雲起久而方歇巨源以爲非常佳瑞請布告天下許之中宗又令畫工圖其狀以示百寮仍大赦天下內外五品已上官母妻各加封邑時中宗旣雅信符瑞巨源又贊成其妖妄是歲星墜如雷野雉皆雊各徭若此不聞巨源有言蓋與韋皇后繼敘源流佞媚官爵疑其開導以踵則天時有驍衛將軍迦

葉志忠太常少卿鄭愔兵部尚書宗楚客右補闕趙延禧等或相
諷諭或上表章譟說符祥朋黨取媚識者嗟憤景龍三年拜尚書
左僕射依舊知政事未幾又拜尚書令同中書門下三品仍舊監
修國史時國家將有事於南郊而巨源希韋后之旨協同祝釁明
之議言皇后合助郊祀竟以皇后為亞獻巨源為終獻又以大臣
女為齋娘及韋庶人之難家人今巨源逃匿巨源曰吾國之大臣豈
得聞難不赴乃出至都街為亂兵所殺時年八十睿宗即位贈特
進荊州大都督太常博士李處直議巨源諡曰昭戶部員外郎李
邕駁之曰三思引之為相阿韋託之為親無功而封無德而祿同
族則醜正安石他人則附邪楚客諡之曰昭良恐不當初巨源與
安石迭為宰相時人以為情不相協故邕以此稱之處直仍固請
依前諡為定邕又駁曰夫古之諡在乎勸沮將杜小人之業冀長
君子之風故為善者雖存不貴仕而沒有餘名此賢達所以砥節也
為惡者雖生有所幸死懷所懲此回邪所以易心也嗚呼巨源嘗

未斯察而乃聞義不從與惡相濟蓄罔上之志協羣兇之謀苟容
聖朝貪昧厚祿自以宰臣之貴不崇朝而賈害者固鬼得而誅之
也彼則匹夫之微未受命而行刑者固人得而誅之也幽明之憤
斷焉可知天地之心自此而見矣頃者皇運中興功臣翼政時序
未幾邪逆執權茲慝者拜爵於私門忠正者降黜於藩郡巨源
此際用事方殷且於阿韋何親而結爲昆季於國家何力而累忝
大官此則闇通中人附會武氏託城社之固亂皇家之基故其罪
一也又國之大事在祀與戎酌於禮經陳於郊祭將以對越天地
光揚祖宗旣告成功以觀海內惟昔亞獻不聞婦人阿韋蓄無君
之誠懷自達之意潛圖帝位議啄皇孫昇壇擬儀拜賜明命將預
家事無守國章巨源創跡於前悖逆演成於後時有禮部侍郎徐
堅太常博士唐紹蔣欽緒彭景直並言之莫從其罪二也又上天
不弔先帝遇毒悔禍無撓阿韋將篡畫計未果逆心尚搖周章
夷猶倉卒迷謬於是太平公主矯爲陳謨上官昭容給草遺詔故

得今上輔政阿韋叅謀將大業垂成而休命中輟者職由巨源躡
韋溫之足楚客附巨源之耳梟聲遽發狼顧相驚以阿韋臨朝以
韋溫當國其罪三也又人爲邦本財實聚人奪其財則人心自離
無其人則國本何恃巨源屢踐台輔專行勾徵廢越條章崇尚侵
刻樹怨天下剥害生靈兆庶流離戶口減耗況以三思食邑往在
貝州時屬久陰災逢多雨租庸捐免申令昭明匪今獨然自古不
易三思慮其封物巨源啓此異端以爲稼穡湮沉雖無菽粟蠶桑
織絀可輸庸調致使河朔黎人海隅士女去其鄉井鬻其子孫飢
寒切身朝夕奔命其罪四也但巨源長於華宗仕於累代作萬國
之相處具瞻之地蔽日月之層輝負丘山之重責今乃妄加褒述
安能分謗者哉當時雖不從邕議而論者是之巨源與安石及則
天時文昌右相待價並是五服之親自餘近屬至大官者數十人
趙彥昭者甘州張掖人也父武孟初以馳騁佃獵爲事嘗獲肥鮮
以遺母母泣曰汝不讀書而佃獵如是吾無望矣竟不食其膳武

孟感激勤學遂博通經史舉進士官至右臺侍御史撰河西人物志十卷彥昭少以文辭知名中宗時累遷中書侍郎同中書門下三品兼修國史充修文館學士景龍四年金城公主出降吐蕃贊普中宗命彥昭爲使彥昭以旣充外使恐失其寵殊不悅司農卿趙履溫私謂曰公國之宰輔而爲一介之使不亦鄙乎彥昭曰計將安出履溫因爲陰託安樂公主密奏留之中宗乃遣左驍衛大將軍楊矩代彥昭而往睿宗時出爲涼州都督爲政清嚴將士已下皆動足股慄又爲宋州刺史入爲吏部侍郎又爲刑部尚書關內道持節巡邊使檢校左御史臺大夫彥昭素與郭元振張說友善及蕭至忠等伏誅元振說等稱彥昭先嘗密圖其事乃以功遷刑部尚書封耿國公賜實封二百戶殿中侍御史郭震奏彥昭以女巫趙五娘左道亂常託爲諸姑潛相影援旣因提挈乃踐合階驅車造門著婦人之服攜妻就謁申猶子之情于時南憲直臣劾以霜憲慙加微貶旋登寵秩同惡相濟一至於此乾坤交泰宇宙

再清不加貶削法將安措請付紫微黃門準法處分俄而姚崇入相甚惡彥昭之爲人由是累貶江州別駕卒

蕭至忠秘書少監德言曾孫也少仕爲畿尉以清謹稱嘗與友人期於路偶會風雪凍冽諸人皆奔避就字下至忠曰寧有與人期而求安失信乎獨不去衆咸歎服神龍初武三思擅權至忠附之自吏部員外擢拜御史中丞遷吏部侍郎仍兼御史中丞侍武三思勢掌選無所忌憚請謁杜絕威風大行尋遷中書侍郎兼中書令節愍太子誅武三思後有三思黨與宗楚客紀處訥令侍御史冉祖雍奏言安國相王及鎮國太平公主亦與太子連謀舉兵請收付制獄中宗召至忠令按其事至忠泣而奏曰陛下富有四海貴爲天子豈不能保一弟一妹受人羅織宗社存亡實在於此臣雖愚昧竊爲陛下不取漢書云一尺布尚可縫一斛粟尚可舂兄弟二人不容願陛下詳察此言且往者則天皇后欲令相王爲太子王累日不食請迎陛下固讓之誠天下傳說足明冉祖雍等所奏

咸是構虛帝深納其言而止尋轉黃門侍郎同中書門下平章事
至忠上疏陳時政曰臣聞王者列職分司爲人求理求理之道必
在用賢得其人則公務克修非其才則厥官如曠官曠則事廢事
廢則人殘漸至凌遲率由於此頃者選曹授職政事官人或異才
昇多非德進皆因依貴要手爲粉飾苟得即是曾無遠圖上下相
蒙誰肯言及臣聞官爵者公器也恩倖者私惠也祇可金帛富之
梁肉食之以存私澤也若以公器爲私用則公議不行而勞人解
體以小私而妨至公則私謁門開而正言路絕儉人遞進君子道
消日削月朘卒見凋弊者爲官非其人也昔漢館陶公主爲子求
郎明帝謂曰郎官上應列宿出宰百里苟非其人則人受其殃賜
錢十萬而已此即至公之道不虧恩私之情無替良吏直筆將爲
美談于今稱之不輟其口者也當今列位已廣冗員倍多祈求未
厭日月增數陛下降不貲之澤近戚有無涯之請賣官利己鬻法
徇私臺寺之內朱紫盈滿官秩益輕恩賞彌數恤利之輩冒進而

莫識廉隅方雅之流知難而斂分丘隴才者莫用用者不才二事
相刑十有其五故人不效力而官匪爲人欲求其理實亦難成臣
竊見宰相及近侍要官子弟多居美爵此並勢要親戚罕有才藝
遞相囑託虛踐官榮詩云東人之子職勞不賚西人之子粲粲衣
服私人之子百寮是試或以其酒不以其將朝朝佩璵不以其長
此言王政不平衆官廢職私家之子列試於榮班非任之人徒長
其飾佩臣愚伏願陛下想居安思危之義行改絃易張之道愛惜
爵賞審量材識官無虛授人必爲官進大雅於樞近退小子於閑
僻政令惟一威恩以信私不害公情不撓法則天下幸甚臣伏見永
徽故事宰相子弟多居外職者非直抑強宗分大族亦以退不肖
擇賢才伏願陛下遠稽舊典近遵先聖特降明勅令宰相已下及
諸司長官子弟並改授外官庶望分職四方共寧百姓表裏相統
遐邇人安跡奏不納明年代韋巨源爲侍中仍依舊修史尋遷中
書令時宗楚客紀處訥潛懷姦計自樹朋黨韋巨源楊再思李嶠

皆唯諾自全無所匡正至忠處於其間頗存正道時議翕然重之
中宗亦曰諸宰相中至忠最憐我韋庶人又爲亡弟贈汝南王洵
與至忠亡女爲冥婚合葬及韋氏敗至忠發墓持其女柩歸人以
此譏之至忠又以女適庶人舅崔從裕之子成禮曰中宗爲蕭氏
婚主韋庶人爲崔氏婚主時人謂之天子嫁女皇后娶婦睿宗即
位景雲初出爲晉州刺史甚有能名時太平公主用事至忠潛遣
間使申意求入爲京職誅韋氏之際至忠子任牛爲亂兵所殺
公主異至忠以此怨望可與謀事即納其請召拜刑部尚書右御
史大夫再遷吏部尚書先天二年復爲中書令是歲至忠與竇懷
貞魏知古崔湜陸象先柳沖徐堅劉子玄等撰成姓族系錄二百
卷有制加爵賜物各有差未幾左僕射竇懷貞侍中岑羲及至忠
并戶部尚書李晉太子少保薛稷左散騎常侍賈膺福左羽林大
將軍常元楷右羽林將軍李慈等與太平公主謀逆事洩至忠遽
遁入山寺數日捕而伏誅籍沒其家至忠雖清儉刻已然簡約自

高未嘗接待賓客所得俸祿亦無所賑施及籍沒財帛其豐由是頓絕聲望矣第元嘉工部侍郎廣微工部員外

宗楚客者蒲州河東人則天從父姊之子也兄秦客垂拱中潛勸則天革命稱帝由是累遷內史後與楚客及弟晉卿並以姦賊事發配涿嶺外秦客死楚客等尋復追還楚客累遷夏官侍郎同鳳閣鸞臺平章事神龍初爲太僕卿武三思用事引楚客爲兵部尚書同中書門下三品晉卿累遷將作大匠節愍太子旣殺武三思兵敗逃於鄆縣楚客遣使追斬之仍令以其首祭三思及崇訓喪柩韋庶人及安樂公主尤加親信未幾遷中書令楚客雖跡附韋氏而嘗別有異圖與侍中紀處訥共爲朋黨故時人呼爲宗紀景龍中西突厥娑葛與阿史那忠節不和屢相侵擾西陲不安安西都護郭元振奏請徙忠節於內地楚客與晉卿處訥等各納忠節重賂奏請發兵以討娑葛不納元振所奏娑葛知而大怒舉兵入寇甚爲邊患於是監察御史崔琬劾奏楚客等曰臣聞四牡項領

良御不乘二心事君明罰無捨謹案宗楚客紀處訥等性惟險詖志越溪壑幸以遭逢聖主累忝殊榮承愷悌之恩居弼諧之地不能刻意砥操憂國如家微效涓塵以裨川嶽遂乃專作威福敢樹朋黨有無君之心闕大臣之節潛通儉狃納賄不貲公引頑兇受賂無限醜問充斥穢行昭彰且境外之交情狀難測今娵葛反叛邊鄙不寧由此賊臣取怨中國論之者懼禍以結舌語之者避罪以鉗口但晉卿昔居榮職素闕忠誠屢抵嚴刑皆由黷貨今又叨忝頻沐殊恩厚祿重權當朝莫比曾無後改仍徇贓私此而可容孰不可恕臣謬忝直指義在觸邪請除巨蠹用答天造楚客處訥晉卿等驕恣跋扈人神同疾不加天誅詎清王度並請收禁差三司推鞠舊制大臣有被御史對仗劾彈者即俯俸趨出立于朝堂待罪楚客更哢鯁作色而進自言以執性忠鯁被琬誣奏中宗竟不能窮覈其事遽令琬與楚客等結爲義故兄弟以和解之韋氏敗楚客與晉卿等皆伏誅

紀處訥者秦州上邽人也娶武三思妻之姊由是累轉太府卿神龍中嘗因穀貴中宗召處訥親問其故武三思諷知太史事右驍衛將軍迦葉志忠太史令傅孝忠奏言其夜有攝提星入太微至帝座此則王者與大臣私相接大臣能納忠故有斯應帝以爲然降勅褒述處訥賜衣一副綵六十段無幾進拜侍中與楚客等同時伏誅史臣曰大帝孝和之朝政不由己則天在位已絕綴旒羣后司晨前蹤覆轍當是時姦邪有黨宰執求容順之則惡其名彰逆之則憂其禍及欲存身致理者非中智常才之所能也況元忠安石巨源至忠彥昭等行非純一識昧存亡徇利貪榮有始無卒不得其死宜哉楚客晉卿處訥等譏諂並進威虐貫盈不使逃刑可謂政正贊曰爲唐重臣食唐重祿顛危不持富貴何足二宗一紀讒邪酷毒與前數公死不知辱

唐書列傳卷第四十二

右文林郎死浙東路提舉茶鹽司幹辦公事蘇之勤校正

唐書列傳卷第四十三

劉 昀

等修

婁師德

王孝傑

唐休璟

張仁愿

薛訥

王峻

婁師德鄭州原武人也弱冠進士擢第授江都尉揚州長史盧承業奇其才嘗謂之曰吾子台輔之器當以子孫相託豈可以官屬常禮待也上元初累補監察御史屬吐蕃犯塞募猛士以討之師德抗表請爲猛士高宗大悅特假朝散大夫從軍西討頻有戰功遷殿中侍御史兼河源軍司馬兼知營田事天授初累授左金吾將軍兼檢校豐州都督仍依舊知營田事則天降書勞曰卿素積忠勤兼懷武略朕所以寄之襟要授以甲兵自卿受委北陞揔司軍任往還靈夏檢校屯田收率旣多京坻遽積不煩和糴之費無復轉輸之艱兩軍及北鎮兵數年咸得支給勤勞之誠久而彌著覽以嘉尚欣悅良深長壽元年召拜夏官侍郎判尚書事明年同

鳳閣鸞臺平章事則天謂師德曰王師外鎮必藉邊境營田卿須
不憚劬勞更充使檢校又以爲河源積石懷遠等軍及河蘭鄯廓
等州檢校營田大使稍遷秋官尚書萬歲登封元年轉左肅政御
史大夫仍並依舊知政事證聖元年吐蕃寇洮州令師德與夏官
尚書王孝傑討之與吐蕃大將論欽陵贊婆戰於素羅汗山官軍
敗績師德貶授原州負外司馬萬歲通天二年入爲鳳閣侍郎同
鳳閣鸞臺平章事是歲兼檢校右肅政御史大夫仍知左肅政臺
事又與王懿宗狄仁傑分道安撫河北諸州神功元年拜納言累
封譙縣子尋詔師德充隴右諸軍大使仍校檢河西營田事聖曆
二年突厥入寇復令檢校并州長史仍充天兵軍大總管是歲九
月卒贈涼州都督諡曰貞初狄仁傑未入相時師德嘗薦之及爲
宰相不知師德薦已數排師德令充外使則天嘗出師德舊表示
之仁傑大慙謂人曰吾爲婁公所舍如此方知不逮婁公遠矣師
德頗有學步哭置里寬厚喜怒不形於色自專綜邊任前後三十

餘年恭勤接下孜孜不怠雖叅知政事深懷畏避音能以功名始終為己任識者所重

王孝傑京兆新豐人也高宗末為副摠管從工部尚書劉審禮西討吐蕃戰於大非川為賊所獲吐蕃贊普見孝傑垂泣曰貌類吾父厚加敬禮由是免死尋得歸則天時累遷右鷹揚衛將軍孝傑久在吐蕃中悉其虛實長壽元年為武威軍摠管與左武衛大將軍阿史那忠節率眾以討吐蕃乃克復龜茲于闐疎勒碎葉四鎮而還則天大悅謂侍臣曰昔貞觀中具綏得此蕃城其後西陲不守並陷吐蕃今既盡復於舊邊境自然無事孝傑建斯功效竭此款誠遂能累足徒行身與士卒齊力如此忠懇深是可嘉乃拜孝傑為左衛大將軍明年遷夏官尚書同鳳閣鸞臺三品封清源男延載初入為瀚海道行軍摠管餘如故證聖初又為朔方道摠管尋坐與吐蕃戰敗免官萬歲通天年契丹李盡忠孫萬榮反叛復詔孝傑白衣起為清邊道摠管統兵十八萬以討之孝傑軍至東

峽石谷遇賊道隘虜甚衆孝傑率精銳之士爲先鋒且戰且前及出谷布方陣以捍賊後軍揔管蘇宏暉畏賊衆棄甲而遁孝傑既無後繼爲賊所乘營中潰亂孝傑墮谷而死兵士爲賊所殺及奔踐而死殆盡時張說爲節度管記馳奏其事則天問孝傑敗亡之狀說曰孝傑忠勇敢死乃誠奉國深入寇境以少禦衆但爲後援不至所以致敗於是追贈孝傑夏官尚書封耿國公拜其子元擇爲朝散大夫遣使斬宏暉以徇使未至幽州而宏暉已立功贖罪竟免誅開元中元擇官至左驍衛將軍以恩例贈孝傑特進

唐休璟京兆始平人也曾祖規周驃騎大將軍安邑縣公祖宗隋大業末爲朔方郡丞時爲梁師都舉兵將據城宗抗節不從乃爲所害休璟少以明經擢第永徽中解褐吳王府典籤無異材調授營府戶曹調露中單于突厥背叛誘扇奚契丹侵掠州其後奚渴胡又與桑乾突厥同反都督周道務遣休璟將兵擊破之於獨護山斬獲甚衆超拜豐州司馬永淳中突厥圍豐州都督崔智辯戰

歿朝議欲罷豐州徙百姓于靈夏休璟以爲不可上書曰豐州控
河邊賊實爲襟帶自秦漢已來列爲郡縣田疇良美尤宜耕牧隋
季喪亂不能堅守乃遷徙百姓就寧慶三州致使戎羯交侵乃以
靈夏爲邊界貞觀之末始募人以實之西北一隅方得寧謐今若廢
棄則河傍之地復爲賊有靈夏等州人不安業非國家之利也朝
廷從其言豐州復存垂拱中遷安西副都護會吐蕃攻破焉耆安
息道大摠管文昌右相韋待價及副使閻溫古失利休璟收其餘
衆以安西土遷西州都督上表請復取四鎮則天遣王孝傑破吐
蕃拔四鎮亦休璟之謀也聖曆中爲司衛卿兼涼州都督右肅政
御史大夫持節隴右諸軍州大使久視元年秋吐蕃大將麴莽布
支率騎數萬寇涼州入自洪源谷將圍昌松縣休璟以數千人往
擊之臨陣登高望見賊衣甲鮮盛謂麾下曰自欽陵死贊婆降麴
莽布支新知賊兵欲曜威武故其國中貴臣酋豪子弟皆從之人
馬雖精不習軍事吾爲諸君取之乃被甲先登與賊六戰六克大

破之斬其副將二人首二千五百級築京觀而還是後休璟入朝吐蕃亦遣使來請和因宴屢覘休璟則天問其故對曰往歲洪源戰時此將軍雄猛無比殺臣將士甚衆故欲識之則天大加歎異擢拜右武威右金吾二衛大將軍休璟尤諳練邊事自碣石西踰四鎮綿亘萬里山川要害皆能記之長安中西突厥烏質勒與諸蕃不和舉兵相持安西道絕表奏相繼則天令休璟與宰相商度事勢俄頃間草奏便遣施行後餘日安西諸州表請兵馬應接程期一如休璟所畫則天謂休璟曰恨用卿晚因遷夏官尚書同鳳閣鸞臺三品又謂魏元忠及楊再思李嶠姚元崇李迥秀等曰休璟諳練邊事卿等十不當一也尋轉太子右庶子依舊知政事以契丹入寇復拜夏官尚書兼檢校幽營等州都督兼安東都護時中宗在春宮將行進啓於皇太子曰張易之兄弟幸蒙寵遇數侍宴禁中縱情失禮非人臣之道惟加防察中宗即位召拜輔國大將軍同中書門下三品封酒泉郡公顧謂曰卿曩日直言朕今不忘

初欲召卿計事但以遐遠兼懷北狄之憂耳未幾加特進拜尚書右僕射是歲秋大水休璟兩上表自咎請免官甚切辭多不載中宗竟不允手制荅曰陰陽乖爽事屬在予待罪私門難依來表尋遷中書令充京師留守俄加檢校吏部尚書又以宮寮之舊賜實封三百戶累封宋國公休璟在任無所弘益景龍二年致仕于家年力雖衰進取彌銳時尚宮賀婁氏頗關預國政憑附者皆得寵榮休璟乃爲其子娶賀婁氏養女爲妻因以自達由是起爲太子少師同中書門下三品監修國史仍封宋國公休璟年踰八十而不知止足依託求進爲時所譏景雲元年又拜特進充朔方道行軍大總管以備突厥停其舊封別賜實封一百戶二年表請致仕許之祿及一品子課並令全給休璟初得封時以絹數千匹分散親族又以家財數十萬大開塋域備禮葬其五服之親時人稱之延和元年七月薨年八十六贈荊州大都督諡曰忠子先慎襲爵官至陳州刺史次子先擇開元中爲右金吾衛將軍

張仁愿華州下邳人也本名仁亶以音類睿宗諱改焉少有文武材幹累遷殿中侍御史時有御史郭霸上表稱則天是彌勒佛身鳳閣舍人張嘉福與洛州人王慶之等請立武承嗣爲皇太子皆請仁愿連名署表仁愿正色拒之甚爲有識所重尋而夏官尚書王孝傑爲吐刺軍摠管統衆以禦吐蕃詔仁愿往監之仁愿與孝傑不協因入奏事稱孝傑軍敗誣罔之狀孝傑由是免爲庶人仁愿遽遷侍御史萬歲通天二年監察御史孫承景監清邊軍戰還畫戰圖以奏每陣必畫承景躬當矢石先鋒禦賊之狀則天歎曰御史乃能盡誠如此擢拜右肅政臺中丞令仁愿敘錄承景下立功人仁愿未發都先問承景對陣勝負之狀承景身實不行問之皆不能對又虛增功狀仁愿廷奏承景罔上之罪於是左遷崇仁令擢仁愿爲肅政臺中丞檢校幽州都督會突厥默啜入寇攻陷趙定擁衆迴至幽州仁愿勒兵出城邀擊之流矢中手賊亦引退則天遣使勞問賜以醫藥累遷并州大都督府長史神龍二年中

宗還京以仁愿爲左屯衛大將軍兼檢校洛州長史時都城穀貴盜竊甚衆仁愿一切皆捕獲杖殺之積屍府門遠近震懼無敢犯者初高宗時賈敦頤爲洛州刺史亦有政績與仁愿皆爲一時之最故時人爲之語曰洛州有前賈後張可敵京兆三王其見稱如此三年突厥入寇朔方軍摠管沙吒忠義爲賊所敗詔仁愿攝御史大夫代忠義統衆仁愿至軍而賊衆已退乃躡其後夜掩大破之先朔方軍北與突厥以河爲界河北岸有拂雲神祠突厥將入寇必先詣祠祭酹求福因牧馬料兵而後渡河時突厥默啜盡衆西擊突騎施娑葛仁愿請乘虛奪取漢南之地於河北築三受降城首尾相應以絕其南寇之路太子少師唐休璟以爲兩漢已來皆北守黃河今於寇境築城恐勞人費功終爲賊虜所有建議以爲不便仁愿固請不已中宗竟從之仁愿表留年滿鎮兵以助其功時咸陽兵二百餘人逃歸仁愿盡擒之一時斬於城下軍中股慄役者盡力六旬而三城俱就以拂雲祠爲中城與東西兩城相去各四

百餘里皆據津濟遙相應接北拓地三百餘里於牛頭朝那山北
置烽候一千八百所自是突厥不得度山放牧朔方無復寇掠滅
鎮兵數萬人仁愿初建三城不置壅門及曲敵戰格之具或問曰
此邊城禦賊之所不爲守備何也仁愿曰兵貴在攻取不宜退守
寇若至此即當併力出戰迴顧望城猶須斬之何用守備生其退
惡之心也其後常元楷爲朔方軍總管始築壅門以備寇議者以
此重仁愿而輕元楷焉仁愿在朔方奏用監察御史張昫忠何鸞
長安尉寇泚鄆縣尉王易從始平主簿劉體微分判軍事太子文
學柳彥昭爲管記義烏尉晁良貞爲隨機昫忠等皆以文吏著稱
多至大官時稱仁愿有知人之鑒景龍二年拜左衛大將軍同中
書門下三品累封韓國公春還朝秋復督軍備邊中宗賦詩祖餞
賞賜不可勝紀尋加鎮軍大將軍睿宗即位以老致仕特全給祿
俸又拜兵部尚書加光祿大夫依舊致仕開元二年卒贈太子少
傅賻物二百段命五品官一人爲監護使子輔之開元初爲趙州刺史

薛訥絳州萬泉人也左武衛大將軍仁貴子也爲藍田令有富商倪氏於御史臺理其私債中丞來俊臣受其貨財斷出義倉米數千石以給之訥曰義倉本備水旱以爲儲蓄安敢絕衆人之命以資一家之產竟報上不與會俊臣得罪其事乃不行其後突厥入寇河北則天以訥將門使攝左武威衛將軍安東道經略臨行於同明殿召見與語訥因奏曰醜虜憑凌以廬陵爲辭今雖有制昇儲外議猶恐未定若此命不易則狂賊自然款伏則天深然其言尋拜幽州都督兼安東都護轉并州大都督府長史兼檢校左衛大將軍久當邊鎮之任累有戰功玄宗即位於新豐講武訥爲左軍節度時元帥與禮官得罪諸部頗亦失序唯訥及解琬之軍不動玄宗令輕騎召訥等至軍門皆不得入禮畢上甚加慰勞時契丹及奚與突厥連和屢爲邊患訥建議請出師討之開元二年夏詔與左監門將軍杜賓客定州刺史崔宜道等率衆二萬出檀州道以討契丹等杜賓客以爲時屬炎暑將士負戈甲齎資糧深入寇

境恐難爲制勝中書令姚元崇亦以爲然訥獨曰夏月草茂羔犢
生息之際不費糧儲亦可漸進一舉振國威靈不可失也時議咸
以爲不便玄宗方欲威服四夷特令訥同紫微黃門三品摠兵擊
奚契丹議者乃息六月師至灤河遇賊時旣蒸暑諸將失計會盡
爲契丹等所覆訥脫身走免歸罪於崔宣道及蕃將李思勣等八
人詔盡令斬之特免杜賓客之罪下制曰并州大都督府長史兼
檢校左衛大將軍和我大武等諸軍州節度大使同紫微黃門三
品薛訥摠戎禦邊建議爲首暗於料敵輕於接戰張我王師衄之
虜境觀其疇昔頗常輸罄每欲資忠報主見義忘身特緩嚴刑俾
期來效宜放其罪所有官爵等並從除削其年八月吐蕃大將全
達延乞力徐等率衆十萬寇臨洮軍又進寇蘭州及渭州之渭源
縣掠羣牧而去詔訥白衣攝左羽林將軍爲隴右防禦使與太僕
少卿王晙等率兵邀擊之十月訥領衆至渭源遇賊戰於武階驛
與王晙犄角夾攻之大破賊衆追奔至洮水又戰于長城堡豐安

軍使王海賓先鋒力戰死之將士乘勢進擊又敗之殺獲萬人擒其將六指鄉彌洪盡收其所掠羊馬并獲其器械不可勝數時有詔將以十二月親征吐蕃及聞訥等剋捷玄宗大悅乃停親征追贈王海賓左金吾衛大將軍賻物三百段粟三百石名其稚子爲忠嗣拜朝散大夫命紫微舍人倪若水往即便敘錄功狀拜訥爲左羽林軍大將軍復封平陽郡公仍拜子暢朝散大夫俄又充涼州鎮軍大揔管尋以年老特聽致仕八年卒年七十餘贈太常卿諡曰昭定訥沉勇寡言臨大敵而益壯訥弟楚玉開元中爲幽州大都督府長史以不稱職見代而卒

王峻滄州景城人徙家于洛陽祖有方岷州刺史峻弱冠明經擢第歷遷殿中侍御史加朝散大夫時朔方軍元帥魏元忠討賊失利歸罪於副將韓思忠奏請誅之峻以思忠旣是偏裨制不由己又有勇智可惜不可獨殺非辜乃廷議爭之思忠竟得釋而峻亦由是出爲渭南令景龍末累轉爲桂州都督桂州舊有屯兵常運

衡永等州糧以饋之。晁始改築羅郭，奏罷屯兵，及轉運又堰江水開屯田數千頃，百姓賴之。尋上疏請歸鄉拜墓，州人詣闕請留。晁乃下勅曰：「彼州往緣寇盜，戶口凋殘，委任失材，乃令至此。卿處事強濟，遠邇寧靜，築城務農，利益已廣，隱括綏緝，復業者多，宜須政成。安此黎庶，百姓又有表請，不須來也。」晁在州又一年，州人立碑以頌其政。再轉鴻臚大卿，充朔方軍副大揔管兼安西大都護。豐安定遠三城及側近軍並受晁節度，後轉太僕少卿。隴右羣牧使開元二年，吐蕃精甲十萬寇臨洮，軍晁率所部二千人卷甲倍程與臨洮兩軍合勢以拒之。賊營於大來谷口，吐蕃將牟達延又率兵繼至。晁乃出奇兵七百人衣之蕃服，夜襲之，相去五里置鼓角令前者遇寇大呼，後者擊鼓以應之。賊衆大懼，疑有伏兵，自相殺傷死者萬計。俄而攝右羽林將軍薛訥率衆邀擊吐蕃至武街谷，去大來谷二十里，爲賊所隔。晁率兵迎訥之軍，賊置兵於兩軍之間，連亘數十里。晁夜出壯士銜枚擊之，賊又大潰，乃與訥合軍掩其餘衆。

追奔至洮水殺獲不可勝數盡收所掠牧馬而還以功加銀青光祿大夫封清源縣男兼原州都督仍拜其子珙爲朝散大夫尋除并州大都督府長史明年突厥默啜爲九姓所殺其下酋長多款塞投降置之河曲之內俄而小殺繼立降者漸叛暖上疏曰突厥時屬亂離所以款塞降附其與部落非有讎嫌情異北風理固明矣養成其豐雖悔可追今者河曲之中安置降虜此輩生梗寔難處置日月漸久姦詐逾深窺邊間隙必爲患難今有降者部落不受軍州進止輒動兵馬屢有傷殺詢問勝州左側被損五百餘人私置烽鋪潛爲抗拒公私行李頗實危懼北虜如或南牧降戶必與連衡臣問沒蕃歸人云却逃者甚衆南北信使委曲通傳此輩降人翻成細作儻收合餘燼來逼軍州虜騎憑凌胡兵應接表裏有敵進退無援雖復韓彭之勇孫吳之策令其制勝其可必乎望至秋冬之際令朔方軍盛陳兵馬告其禍福啗以縑帛之利示以麋鹿之饒說其魚米之鄉陳其畜牧之地並分配淮南河南寬鄉安

置仍給程糧送至配所雖復一時勞弊必得久長安穩二十年后漸染淳風持以充兵皆爲勁卒若以北狄降者不可南中安置則高麗俘虜置之沙漠之曲西域編氓散在青徐之右唯利是視務安疆場何獨降胡不可移徙近者在邊將士爰及安蕃使人多作諛辭不爲實對或言北虜破滅或言降戶安靜志欲自言功效非有以徇邦家伏願察斯利口行茲遠慮邊萊清晏黎元幸甚臣料留住之議謀者云適故事必言降戶之輩舊置河曲之中昔年旣得康寧今日還應穩便但同時異事先典攸傳往者頡利破亡邊境寧謐降戶之輩無復他心所以多歷歲年此類皆無動靜今虜見未破滅降戶私使往來或畏北虜之威或懷北虜之惠又是北虜戚屬夫豈不識親疎將比昔年安可同日臣料其中頗有三策若盛陳兵馬散令分配內獲精兵之實外祛黠虜之謀暫勞永安此上策也若多屯士卒廣爲備擬亭障之地蕃漢相叅費甚人勞此下策也若置之朔塞任之來往通傳信息結成禍胎此無策也

伏願察斯三者詳其善惡利害之狀長短可尋縱因遷移或致逃
叛但有移得之者即是今日良圖留待河冰恐即有變臣蒙天澤
叨居重鎮逆耳利行敢不盡言疏奏未報降虜果叛勑駿帥并州
兵西濟河以討之駿乃間行倍道以夜繼書卷甲捨幕而趨之夜
於山中忽遇風雪甚盛駿恐失期仰天誓曰駿若事君不忠不討
有罪明靈所殛固自當之而士衆何辜令其艱苦若誠心忠烈天
監孔明當止雪迴風以濟戎事言訖風迴而雪止時叛者分爲兩
道其在東者駿追及之殺一千五百餘人生獲一千四百餘人馳馬牛
羊甚衆駿以功遷左散騎常侍持節朔方道行軍大總管尋遷御
史大夫時突厥趺跌部落及僕固都督勾磨等散在受降城左右
居止且謀引突厥共爲表裏重陷軍城而叛駿因入奏密請誅之八
年秋駿誘趺跌等黨與八百餘人於中受降城由是乃授駿兵部
尚書復充朔方軍大總管九年蘭池州胡苦於賦役誘降虜餘燼
攻夏州反叛詔隴右節度使羽林將軍郭知運與駿相知討之駿

奏朔方軍兵自有餘力其郭知運請還本軍未報而知運兵至與
皎頗不相協皎所招撫降者知運縱兵擊之賊以爲皎所賣皆相
率叛走皎進封清源縣公仍兼御史大夫俄而賊衆復相結聚皎
坐左遷梓州刺史十年拜太子詹事累封中山郡公屬車駕北巡
以皎爲吏部尚書兼太原尹十年夏代張說爲兵部尚書同中書
門下三品追錄破胡之功加金紫光祿大夫仍充朔方軍節度大使
其年冬上親郊祀追皎赴京以會大禮皎以時屬冰壯恐虜騎乘
隙入寇表辭不赴手勅慰勉仍賜衣一副會許州刺史王喬家奴
告喬與皎潛謀構逆勅侍中源乾曜中書令張說鞠其狀皎旣無
反狀乃以違詔追不到左遷^謫鄆州刺史十四年累遷戶部尚書復
爲朔方軍節度使二十年卒年七十餘贈尚書左丞相諡曰忠烈往
歲魏元忠爲張易之昌宗所誹左授高要尉皎密狀申明之宋璟
時爲鳳閣舍人謂皎曰魏公日全矣子胥威嚴而理坐恐子之狼
狽也皎曰魏公忠而獲罪皎爲義所激顛沛無恨璟歎曰璟不能

申魏公之枉深負朝廷矣。賁氣貌雄壯，時人謂之有熊虎之狀。然慕義激勵，有古人之風。御下整肅，人吏畏而愛之。賁卒後，信安王禕於幽州討奚，告捷奏稱：「軍士咸見賁與蕃將高昭領兵馬先軍討賊，上聞而嗟異。」久之，戶部郎中陽伯城上疏請賁等墳特乞增脩封域，量加表異，降使饗祭，優其子孫。玄宗乃遣使就其家廟祭，仍加其子官秩。

史臣曰：婁師德應召而慷慨勇也，薦仁傑而入用，忠也不使仁傑知之，公也。營田贍軍，智也。恭勤接下，和也。叅知政事，功名有卒，是人之難也。又何愧於將相乎？王孝傑、唐休璟、張仁愿、薛訥、王賁等皆韜武幹，亟立邊功。然孝傑失於再擒，休璟虧於餘行，先敗後勝。薛訥何慙？止雪迴風。王賁難掩仁愿操履，中否相兼。

贊曰：拯物之心，不形於色。將相之材，人何以測？臣有始終功無爽忒，多忌梁公自招。慙德唐張訥，賁善陣能師，共服戎虜，不憂邊陲。

唐書列傳卷第四十三

右文林郎充兩浙東路提舉茶鹽司幹辦事蘇之勤校勘

唐書列傳卷第四十四

蘇味道

李嶠

崔融

盧藏用

徐彥伯

劉

昉

等修

蘇味道趙州欒城人也少與鄉人李嶠俱以文辭知名時人謂之蘇李弱冠本州舉進士累轉咸陽尉吏部侍郎裴行儉先知其貴甚加禮遇及征突厥阿史那都之引爲管記孝敬皇帝妃父裴居道再登左金吾將軍訪當時才子爲謝表託於味道援筆而成辭理精密盛傳於代延載初歷遷鳳閣舍人檢校鳳閣侍郎同鳳閣鸞臺平章事尋加正授證聖元年坐事出爲集州刺史俄召拜天官侍郎聖曆初遷鳳閣侍郎同鳳閣鸞臺三品味道善敷奏多識臺閣故事然而前後居相位數載竟不能有所發明但脂韋其間苟度取容而已嘗謂人曰處事不欲波斷明白若有錯誤必貽咎譴但摸稜以持兩端可矣時人由是號爲蘇摸稜長安中請還鄉改

葬其父優制令州縣供其葬事味道因此侵毀鄉人墓田役使過
度爲憲司所劾左授坊州刺史未幾除益州大都督府長史神龍
初以親附張易之昌宗貶授郿州刺史俄而復爲益州大都督府
長史未行而卒年五十八贈異州刺史味道與其弟太子洗馬味玄
甚相友愛味玄若請託不諧輒面加凌折味道對之怡然不以爲
忤論者稱焉有文集行於代

李嶠趙州贊皇人隋內史侍郎元操從曾孫也代爲著姓父鎮惡
襄城令嶠早孤事母以孝聞爲兒童時夢有神人遺之雙筆自是
漸有學業弱冠舉進士累轉監察御史時嶺南邕嚴二州首領反
叛發兵討擊高宗令嶠往監軍事嶠乃宜朝旨持赦其罪親入療
洞以招諭之叛者盡降因罷兵而還高宗甚嘉之累遷給事中時
酷吏來俊臣構陷狄仁傑李嗣真裴宣禮等三家奏請誅之則天
使嶠與大理少卿張德裕侍御史劉憲覆其獄德裕等雖知其
枉懼罪並從俊臣所奏嶠曰豈有知其枉濫而不爲申明哉孔子

曰見義不爲無勇也乃與德裕等列其枉狀由是忤旨出爲潤州司馬詔入轉鳳閣舍人則天深加接待朝廷每有大手筆皆特令矯爲之初置右御史臺巡按天下嶠上疏陳其得失曰陛下創置右臺分巡天下察吏人善惡觀風俗得失斯政途之綱紀禮法之準繩無以加也然猶有未折衷者臣請試論之夫禁網尚疎法令宜簡簡則法易行而不煩雜疎則所羅廣而無苛碎竊見垂拱二年諸道巡察使所奏科目凡有四十四件至於別準格勅令察訪者又有三十餘條而巡察使率是三月已後出都十一月終奏事時限迫促簿書填委晝夜奔逐以赴限期而每道所察文武官多至二千餘人少者千已下皆須品量才行褻貶得失欲令曲盡行能則皆不暇此非敢墮於職而慢於官也實才有限而力不及耳臣望量其功程與其節制使器周於用力濟於時然後進退可以責成得失可以精覈矣又曰今之所察但準漢之六條推而廣之則無不包矣無爲多張科目空費簿書且朝廷萬機非無事之動當

在四方是故冠蓋相望郵駟繼踵今巡使既出其外州之事悉當
委之則傳驛大減矣然則御史之職故不可得閑自非分州統理
無由濟其繁務請大小相兼率十州置御史一人以周年爲限使其
親至屬縣或入閭里督察茲訛觀採風俗然後可以求其實効課
其成功若此法果行必大裨政化且御史出持霜簡入奏天闕其
於勵己自修奉職存憲比於他吏可相百也若其按劾姦邪糾擿
欺隱比於他吏可相十也陛下試用臣言妙擇賢能委之心膺假
溫言以樹之陳賞罰以勸之則莫不盡力而効死矣何政事之不
理何禁令之不行何妖孽之敢興則天善之乃下制分天下爲二十
道簡擇堪爲使者會有阻議者竟不行尋知天官侍郎事遷麟
臺少監聖曆初與姚崇偕遷同鳳閣鸞臺平章事俄轉鸞臺侍
郎依舊平章事兼修國史久視元年嶠舅天官侍郎張錫入知政
事嶠轉成均祭酒罷知政事及修史舅甥相繼在相位時人榮之
嶠尋檢校文昌左丞東都留守長安三年嶠復以本官平章事尋

知納言事明年遷內史嶠後固辭煩劇復拜成均祭酒平章事如故長安未則天將建大像於白司馬坂嶠上疏諫之其略曰臣以法王慈敏菩薩護持唯擬饒益衆生非要營修土木伏聞造像稅非戶口錢出僧尼不得州縣祇承必是不能濟辦終須科率豈免勞擾天下編戶貧弱者衆亦有庸力客作以濟糶糧亦有賣舍貼田以供王役造像錢見有千七萬餘貫若將散施廣濟貧窮人與一千濟得千七萬餘戶拯飢寒之弊省勞役之勤順諸佛慈悲之需聖君亭育之意人神胥悅功德無窮跡奏不納中宗即位嶠以附會張易之兄弟出爲豫州刺史未行又貶爲通州刺史數月徵拜吏部侍郎封贊皇縣男無幾遷吏部尚書進封縣公神龍二年代韋安石爲中書令初嶠在吏部時志欲曲行私惠異得復居相位奏置員外官數千人至是官寮倍多府庫減耗乃抗表引咎辭職并陳利害千餘事中宗以嶠昌言時政之失輒請罷免手制慰諭而不允尋令復居舊職三年又加修文館大學士監修國史封趙

國公景龍三年罷中書令以特進守兵部尚書同中書門下三品
睿宗即位出爲懷州刺史尋以年老致仕初中宗崩嶠密表請處
置相王諸子勿令在京及玄宗踐祚宮內獲其表以示侍臣或請
誅之中書令張說曰嶠雖不辯逆順然亦爲當時之謀吠非其主
不可追討其罪上從其言乃下制曰事君之節危而不變爲臣則
忠貳乃無捨特進趙國公李嶠往緣宗韋弒逆朕恭行戡定揖讓
之際天命有歸嶠有窺覲不知逆順狀陳詭計朕親覽焉以其早
負辭學累居台輔忍而莫言特掩其惡今忠邪旣辨具物惟新賞
罰儆垂下人安勸雖經赦令猶宜放斥矜其老疾俾遂餘生宜聽
隨子虔州刺史暢赴任尋起爲廬州別駕而卒有文集五十卷

崔融齊州全節人初應八科舉擢第累補官門丞兼直崇文館學
士中宗在春官制融爲侍讀兼侍屬文東朝表疏多成其手聖曆
中則天幸嵩嶽見融所撰啓母廟碑深加歎美及封禪畢乃命融
撰朝覲碑文自魏州司功叅軍擢授著作佐郎尋轉右史聖曆二

年除著作郎仍兼右史內供奉四年遷鳳閣舍人久視元年坐忤
張昌宗意左授婺州長史頃之昌宗怒解又請召爲春官郎中知
制誥事長安二年再遷鳳閣舍人三年兼修國史時有司表稅關
市融深以爲不可上疏諫曰伏見有司稅關市事條不限工商但
是行人盡稅者臣謹按周禮九賦其七曰關市之賦竊惟市縱繁
巧關通末遊欲令此徒止抑所以咸增賦稅臣謹商度今古料量
家國竊將爲不可稅謹件事跡如左伏惟聖旨擇焉往古之時淳
樸未散公田籍而不稅關防譏而不征中代已來澆風驟進桑麻
疲弊稼穡辛勤於是各徇通財爭趨作巧求徑捷之欲速忘歲計
之無餘遂使田萊曰荒倉廩不積蠶織休廢弊緼關如飢寒猥臻
亂離斯起先王懲其若此所以變古隨時依本者恒科占末者增
稅夫關市之稅者謂市及國門關門者也唯斂出入之商賈不稅來
往之行人今若不論商人通取諸色事不師古法乃任情悠悠未
代於何瞻仰濟濟盛朝自取嗤笑雖欲憲章姬典乃是違背周官

臣知其不可者一也臣謹案易繫辭稱庖羲氏沒神農氏作曰中爲市致天下之人聚天下之貨交易而退各得其所班志亦云財者帝王聚人守位養成羣生奉順天德理國安人之本也仕農工商四人有業學以居位曰仕闢土殖穀曰農作巧成器曰工通財鬻貨曰商聖王量能授事四人陳力受職然則四人各業久矣今復安得動而搖之蕭何云人情一定不可復動班固又云曹參相齊齊國安集大稱賢相參去屬其後相曰以齊獄市爲寄慎勿擾也後相曰理無大於此者乎參曰不然夫獄市者所以并容也今若擾之姦人安所容乎吾是以先之夫獄市兼受善惡若窮極姦人無所容竄姦人無所容竄久且爲亂秦人極刑而天下叛孝武峻法而刑獄繁此其効也老子曰我無爲而人自化我好靜而人自正參欲以道化其本不欲擾其末臣知其不可者二也四海之廣九州之雜關必據險路市必憑要津若乃富商大賈豪宗惡少輕死重義結黨連羣啗鳴則彎弓睚眦則挺劍小有失意且猶如此一旦變法

定是相驚乘茲困窮或致搖動便恐南走越北走胡非唯流逆齊人亦自攪亂殊俗又如邊徼之地寇賊爲隣興胡之旅歲月相繼儻因科賦致有猜疑一從散亡何以制禁求利雖切爲害方深而有司上言不識大體徒欲益帑藏助軍國殊不知軍國益擾帑藏逾空臣知其不可者三也孟軻又云古之爲關也將以禦暴今之爲關也將以爲暴今行者皆稅本末同條且如天下諸津舟航所聚旁通巴漢前指閩越七澤十藪三江五湖控引河洛兼包淮海弘舸巨艦千軸萬艘交貨往還昧旦永日今若江津河口置鋪納稅納稅則檢覆檢覆則遲留此律纔過彼鋪復止非唯國家稅錢更遭主司僭賂船有大小載有少多量物而稅觸途淹久統論一日之中未過十分之二因此擁滯必致吁嗟一朝失利則萬商廢業萬商廢業則人不聊生其間或有輕詆任俠之徒斬龍刺蛟之黨鄱陽暴謔之客富平悍壯之夫居則藏鏹出便竦劍加以重稅因之以威脅一旦獸窮則搏鳥窮則攫執事者復何以安之哉臣知其

不可者四也五帝之初不可詳已三王之後厥有著云秦漢相承典章大備至如關市之稅史籍有文秦政以雄圖武力捨之而不用也漢武以霸略英才去之而勿取也何則關爲禦暴之所市爲聚人之地稅市則人散稅關則暴興暴興則起異圖人散則懷不軌夫人心莫不背善而樂禍易動而難安二市不安則天下之市心搖矣一關不安則天下之關心動矣況澆風久扇變法爲難徒欲禁未遊規小利豈知失立默亂太倫魏晉眇小齊隋齷齪亦所不行斯道存也臣知其不可者五也今之所以稅關市者何也豈不以國用不足邊寇爲虞一行斯術冀有殷贍然也微臣敢借前箸以籌之伏惟陛下當聖期御玄籙沉璧于洛刻石于嵩鑄寶鼎以窮姦坐明堂而布政神化廣洽至德潛通東夷慙應時平殄南蠻纔動計日歸降西域五十餘國廣輪一萬餘里城堡清夷亭候靜謐比爲患者唯苦二蕃今吐蕃請命邊事不起即日雖尚屯兵久後終成弛柝獨有默啜假息孤恩惡貫禍盈覆亡不暇征

役日已省矣繁費日已稀矣然猶下明制遵大樸愛人力惜人財
王侯舊封妃主新禮所有支料咸令減削此陛下以躬率先堯舜
之用心也且關中河北水旱數年諸處逃亡今始安輯儻加重稅
或慮相驚況承平歲積薄賦日久俗荷深恩人知自樂卒有變法
必多生怨生怨則驚擾驚擾則不安中既不安外何能禦文王曰
帝王富其人霸王富其地理國若不足亂國若有餘古人有言帝
王藏於天下諸侯藏於百姓農夫藏於庾商賈藏於篋惟陛下詳
之必若師興有費國儲多窘即請倍算商客加斂平人如此則國
保富強人免憂懼天下幸甚臣知其不可者六也陛下留神繫表
屬想政源冒茲炎熾早朝晏坐一日二日機務不遺先天後天虛心
密應時政得失小子何知率陳瞽辭伏紙惶懼跡奏則天納之乃
寢其事四年除司禮少卿仍知制誥時張易之兄弟頗招集文學
之士融與納言李嶠鳳閣侍郎蘇味道麟臺少監王紹宗等俱
以文才降節事之及易之伏誅融左授索州刺史尋召拜國子司

業兼修國史神龍二年以預修則天實錄成封清河縣子賜物五百段爾璽書褒美融為文典麗當時罕有其比朝廷所須洛出寶圖頌則天哀冊文及諸大手筆並手勅付融撰哀冊文用思精苦遂發病卒時年五十四以侍讀之恩追贈衛州刺史諡曰文有集六十卷二子禹錫翹開元中相次為中書舍人

盧藏用字子潛度支尚書承慶之姪孫也父瑋有名於時官至魏州司馬藏用少以辭學著稱初舉進士選不調乃著芳草賦以見意尋隱居終南山學辟穀練氣之術長安中徵拜左拾遺時則天將營興泰宮於萬安山藏用上疏諫曰臣愚雖不達時變竊嘗讀書見自古帝王之迹衆矣臣聞土階三尺茅茨不翦采椽不斲者唐堯之德也卑宮室菲飲食盡力於溝洫者大禹之行也惜中人十家之產而罷露臺之制者漢文之明也並能垂名無窮為帝皇之烈豈不以克念徇物博施濟衆以臻於仁恕哉今陛下崇臺邃宇離宮別館亦已多矣更窮人之力以事土木臣恐議者以陛下

爲不受人務奉已也且頃歲已來雖年穀頗登而百姓未有儲蓄
陛下西幸東巡人未休息土木之役歲月不空陛下不因此時施德
布化復廣造宮苑臣恐人未易堪今左右近臣多以順意爲忠朝
廷具僚皆以犯忤爲患至今陛下不知百姓失業亦不知左右傷
陛下之仁也臣聞忠臣不避死亡之患以納君於仁也明主不惡切
直之言以垂名千載陛下誠能發明恕之制以勞人爲辭則天下
必以陛下爲惜人力而苦已也小臣固陋不識忌諱敢冒死上聞乞
下臣此章與執事者議其可否則天下幸甚神龍中累轉起居舍
人兼知制誥俄遷中書舍人藏用常以俗多拘忌有乖至理乃著
析滯論以暢其事辭曰客曰天道玄微神理幽化聖人所以法象
衆庶由其運行故大撓造甲子容成著律曆黃公裁變玄女啓謨
八門御時六神直事從之者則兵強國富違之者則將弱朝危有
同影響若合符契先生亦嘗聞之乎主人曰何爲其然也子所謂
曲學所習瞞昧所守徒識偏方之詭說未究亨衢之通論蓋易曰

先天不違傳稱人神之主範圍不過三才所以虛中進退非邪百
王所以無外故曰國之將興聽於人將亡聽於神又曰禍福無門
唯人所召人無疊焉然不自作由是言之得喪興亡並關人事吉
凶悔愆無涉天時且皇天無親唯德是輔爲不善者天降之殃高
宗修德桑穀以變宋君引過法星退舍此天道所以從人者也古
之爲政者刑獄不濫則人壽賦斂蠲省則人富法令有常則國靜
賞罰得中則兵強所以禮者士之所歸賞者士之所死禮賞不倦
則士爭先苟違此途雖上時行刑擇日出令必無成功矣自叔世
遷訛俗多微倖競稱怪力爭誦詭言屈政教而就孤虛棄信賞而
從推步附會前史變易舊經依託空文以爲徵據覆軍敗將者則
隱秘無聞偶同幸中者則共相文飾豈唯德之增惑亦乃學人自
是嗚呼習俗訛謬一至此焉昔者甲子興師非成功之日往亡用
事異制勝之辰人事苟脩何往不濟至若環城自守接陣重圍無
闕地形不乖天道若兵強將智粟積城堅雖復屢轉魁剛頻移

太歲坐推白虎行計貪狼自符雞鬬之祥多貽蟻附之困故曰任
賢使能則不時日而事利明法審令則不卜筮而事吉養勞賞功
則不禱祠而得福此所謂天時不如地利地利不如人和太公犯兩
逆天時也韓信背水乖地利也並存人事俱成大業削樹而斬龐
涓舉火而屠張郃未必暗同歲德冥會日遊俱運三門並占四殺
杜郵齒劍抑唯計沮坂下悲歌實階刳印若以並資厭勝不事良
圖則長平盡坑固須恒濟襄城無噍亦可常保是知拘而多忌終
喪大功百姓與能必遺小數金雞玉鶴方爲楚國之殃萬畢枕中
適構淮南之禍刻符指盜反更亡身被髮數神翻招夷族嗟乎威
斗不懷赤伏之運築城斷崗何救素靈之哭火災不驗禪竈無力
以窺天超乘階凶王孫取監於觀德九轡九變是曰長途人謀鬼
謀良歸有道此並經史陳迹賢聖通規仁遠乎哉詎宜滯執客乃
蹙然避席曰鄙人困蒙不階至道請事斯語歸于正途而今而後
焚著龜毀律曆廢六合斥五行浩然清慮則將奚若荅曰此所謂

過猶不及也夫甲子所以配日月律曆所以通歲時金木所以備法象著龜所以筮吉凶聖人以此神明德行輔助謀猷存之則協贊成功執之則凝滯於物消息之義其在茲乎客於是循牆匍匐怙然無氣口欬心醉不知所以荅矣景龍中爲吏部侍郎藏用性無挺特多爲權要所逼頗隳公道又遷黃門侍郎兼昭文館學士轉工部侍郎尚書右丞先天中坐託附太平公主配流嶺表開元初起爲黔州都督府長史兼判都督事未行而卒年五十餘有集二十卷藏用工篆隸好琴碁當時稱爲多能之士少與陳子昂趙貞固友善二人並早卒藏用厚撫其子爲時所稱然初隱居之時有貞儉之操往來于少室終南二山時人稱爲隨駕隱士及登朝趙起詭佞專事權貴奢靡淫縱以此獲譏于世

徐彥伯兗州瑕丘人也少以文章擅名河北道安撫大使薛元超表薦之對策擢第累轉蒲州司兵參軍時司戶韋昌善判事司李且工於翰札而彥伯以文辭雅美時人謂之河中三絕彥

伯聖曆中累除給事中時王公卿士多以言語不慎密爲酷吏周興來俊臣等所陷彥伯乃著樞機論以誠于代其辭曰書曰惟口起羞惟甲冑起戎又云齊乃位度適口易曰慎言語節飲食又云出其言善千里應之出其言不善千里違之禮亦云可言也不可行也君子不言也可行也不可言也君子不行也嗚呼先聖知言之爲大也知言之爲急也精微以勸之典謨以告之禮經以防之守名教者何可不脩其詁訓而服其糟粕乎故曰言語者君子之樞機動則物應物應則得失之見也得之者江海比隣失之者肝膽楚越然後知否泰榮辱繫於言乎夫三言者德之柄也行之主也志之端也身之文也旣可以濟身亦可以覆身故中庸鑠其心左階銘其背南容復於白圭箕子疇於洪範良有以也是以撝撝瑕玷衆詳躁競審無常以階亂將不密以致危利生於口木然覆邦之說道不由衷變彼如簧之刺可不懼之哉其有識暗邪正慮微形朕破金湯之籥封禍亂之根用詁誦爲全計以號詆爲令德至若梧宮

問荅荆齊所以奔命韓魏加肘智伯所以危殘蔡侯繩息嬀也亟
招甲兵之罰鄭曼圖宗卿也而受鼎鑊之誅史遷輕議終下蠶室
張紘詭說更齒龍淵凡此過言其沫匪或穢猶糞土或動成刀劍
或苟且其心或脂膏其吻挾邪作蠱守之而不解往輒破的去之
而彌遠亦何異韓臯聚音厖也羣吠得死為幸何循名之立乎雖
復伯玉沮顏追謝於元凱蔣濟貽恨失譽於王陵犀首沒齒於季
章曹瞞齟舌於劉主當何及哉孔子曰子欲無言又云終身為善一
言敗之惜也老子亦云多言數窮又云聰明深察而近於死者議
人者也何聖人之深思偉慮杜漸防萌之至乎夫不可言而言者
曰狂可言而不言者曰隱鉗舌拱默曷通彼此之懷括囊而覲孰
啓甚明之訓則上言者下聽也下言者上用也睿喆之言猶天地也
人覆燾而生焉大雅之言猶鐘鼓也人考擊而樂焉作以龜鏡姬
公之言也出為金石曾子之言也存其家邦國僑之言也立而不
朽臧孫之言也是謂德音謂我宗極滿于天下貽厥後昆殷宗甘

之於酒醴孫卿諭之以琴瑟關里重於四時郢都輕其千乘豈不
賄哉豈不休哉但楫琛世猷克念丕訓審思而應精慮而動謀其
心以後發擇其交以後談不惑趨於非黨不屏營於詭遇非先王
之至德不敢行非先王之法言不敢道翦其謀謀之緒撲其炎炎
之勢自然介爾景福錫茲純嘏則悔吝何由而生怨惡何由而至
哉孔子曰終日行不遺已患終日言不遺已憂如此迺可以言也
戒之哉戒之哉神龍元年遷太常少卿兼修國史以預修則天寶
錄成封高平縣子賜物五百段未幾出爲衛州刺史以善政聞璽
書勞勲俄轉蒲州刺史入爲工部侍郎尋除衛尉卿兼昭文館學
士景龍三年中宗親拜南郊彦伯作南郊賦以獻辭甚典美景雲
初加銀青光祿大夫遷右散騎常侍太子賓客仍兼昭文館學士
先天元年以疾乞骸骨許之開元二年卒彦伯事寡嫂甚謹撫諸
姪同於己子自晚年屬文好爲強澁之體頗爲後進所效焉有文
集二十卷行於時

史臣曰才出於智行出於性故文章巧拙由智之深淺也行義詭實由性之善惡也然則智性稟之於氣不可使之彊也蘇味道李嶠等俱爲輔相各處穹崇觀其章跡之能非無輿瞻驗以弼諧之道罔有貞純故狄仁傑有言曰蘇李足爲文吏矣得非齷齪者乎摸稜之病尤足可譏崔融盧藏用徐彦伯等文學之功不讓蘇李止有守常之道而無應變之機規諫之深崔比盧徐稍爲優矣贊曰房杜姚宋俱立大功咸以二族譚爲美風蘇李文學一代之雄有慙輔弼稱之豈同凡人有言未必有德崔與盧徐皆攻翰墨文雖堪尚義無可則備位守常斯言罔忒

唐書列傳卷第四十四

右文林郎充兩浙東路提舉茶鹽司幹辦公事蘇之勤秘勘

唐書列傳卷第四十五

劉

昉

讓皇帝憲

惠莊太子撝

惠文太子範

惠宣太子業

隋王隆悌

睿宗六子昭成順聖皇后竇氏生玄宗肅明順聖皇后劉氏生讓
皇帝宮人柳氏生惠莊太子崔孺人生惠文太子王德妃生惠宣
太子後宮生隋王隆悌

讓皇帝憲本名成器睿宗長子也初封永平郡王文明元年立為
皇太子時年六歲及睿宗降為皇嗣則天冊授成器為皇孫與諸
弟同日出閣開府置官屬長壽二年改封壽春郡王仍却入閣長
安中累轉左贊善大夫加銀青光祿大夫中宗即位改封蔡王遷
宗正貲外卿加賜實封四百戶通舊為七百戶成器固辭不敢當
大國依舊為壽春郡王唐隆元年進封宋王其月睿宗踐祚拜左
衛大將軍時將建儲貳以成器嫡長而玄宗有討平韋氏之功意



久不定成器辭曰儲副者天下之公器時平則先嫡長國難則歸有功若失其宜海內失望非社稷之福臣今敢以死請累曰涕泣固讓言甚切至時諸王公卿亦言平王有社稷大功合居儲位睿宗嘉成器之意乃許之玄宗又以成器嫡長再抗表固讓睿宗不許乃下制曰左衛大將軍宋王成器朕之元子當踐副君以隆基有社稷大功人神僉屬由是朕前懇讓言在必行天下至公誠不可奪爰符立季之典庶協從人之願成器可雍州牧揚州大都督太子太師別加實封二千戶賜物五千段細馬二十匹奴婢十房甲第二區良田三十頃其年十一月拜尚書左僕射尋遷司徒其太師都督並如故明年表讓司徒拜太子賓客兼揚州大都督如故時太平公主陰有異圖姚元之宋璟等請出成器及申王成義爲刺史以絕謀者之心由是成器以司徒兼蒲州刺史玄宗嘗製一大被長枕將與成器等共申友悌之好睿宗知而大悅累加賞歎先天元年八月進封司空及玄宗討平蕭至忠岑義等成器又進位

太尉依舊兼揚州大都督加實封千戶月餘加授開府儀同三司其太尉揚州大都督並停開元初歷岐州刺史開府如故四年避昭成皇后尊號改名憲封爲寧王實封累至五千五百戶又歷澤潞等州刺史初玄宗兄弟聖曆初出閣列第於東都積善坊五人分院同居號五王宅大足元年從幸西京賜宅於興慶坊亦號五王宅及先天之後興慶是龍潛舊邸因以爲宮憲於勝業東南角賜宅申王撝岐王範於安興坊東南賜宅薛王業於勝業西北角賜宅邸第相望環於宮側玄宗於興慶宮西南置樓西面題曰花萼相輝之樓南面題曰勤政務本之樓玄宗時登樓聞諸王音樂之聲咸召登樓同榻宴謔或便幸其第賜金分帛厚其歡賞諸王每日於側門朝見歸宅之後即奏樂縱飲擊毬鬪雞或近郊從禽或別墅追賞不絕於歲月矣遊踐之所中使相望以爲天子友悌近古無比故人無間然玄宗旣篤於昆季雖有讒言交構其間而友愛如初憲尤恭謹畏慎未曾干議時政及與人交結玄宗尤加

信重之嘗與憲及岐王範等書曰昔魏文帝詩云西山一何高高與
殊無極上有兩僊童不飲亦不食賜我一丸藥光耀有五色服藥
四五日身輕生羽翼朕每思服藥而求羽翼何如骨肉兄弟天生
之羽翼乎陳思有超代之才堪佐經綸之務絕其朝謁卒令憂死
魏祚未終遭司馬宣王之奪豈神九之効也虞舜至聖捨象傲之
愆以親九族九族既睦平章百姓此爲帝王之軌則于今數千歲
天下歸善焉朕未嘗不廢寢忘食欽歎者也頃因餘暇妙選僊經
得此神方古老云服之必驗今分此藥願與兄弟等同保長齡永
無限極憲開元九年兼太常卿十四年停太常卿依舊爲開府儀
同三司二十一年復拜太尉二十八年冬憲寢疾上令中使送醫藥
及珍膳相望於路僧崇一療憲稍瘳上大悅特賜緋袍魚袋以賞
異崇一時申王等皆先薨唯憲獨在上尤加恩貸每年至憲生日
必幸其宅移時宴樂居常無日不賜酒酪及異饌等尚食摠監及
四方有所進獻食之稍甘即皆分以賜之憲嘗奏請年終錄付史

館每年至數百紙二十九年冬京城寒甚疑霜封樹時學者以爲
春秋雨木冰即此是亦名樹介言其象介冑也憲見而歎曰此俗
謂樹稼者也諺曰樹稼達官怕必有大臣當之吾其死矣十月薨
時年六十三上聞之號叫失聲左右皆掩涕翌日下制曰能以位
讓爲吳大伯存則用成其節歿則當表其賢非常之稱旌德斯在
故太尉寧王憲誕含粹靈允膺大雅孝悌之至本乎中誠仁和之
深非因外獎率由禮度雅尚文儒謙以自牧樂以爲善比兩獻而
有光與二南而合德自出臨方鎮入配台階逾勵忠勤益聞周慎
實謂永爲藩屏以輔邦家曾不慙遺奄焉殂沒友于之痛震慟良
深惟王朕之元昆合昇上嗣以朕奉先朝之睿略定宗社之阡危推
而不居請予主鬯又承慈旨焉敢固違不然者則宸極之尊豈歸
於薄德茂行若此易名是憑自非大號孰副休烈按諡法推功尚
善曰讓德性寬柔曰讓崩追諡曰讓皇帝宜令所司擇日備禮冊
命憲長子汝南郡王璉又上表懇辭盛陳先意謙退不敢當帝號

手制不許及冊斂之日內出御衣一副仍令右監門大將軍高力士
賫手書寘于靈座之前其書曰隆基白一代兄弟一朝存歿家人
之禮是用申情興言感恩悲涕交集大哥孝友近古莫儔嘗號
五王同開邸第遠自童幼泊乎長成出則同遊學則同業事均形
影無不相隨頃以國步艱危義資克定先帝御極日月照臨大哥
嫡長合當儲貳以功見讓爰在薄躬既嗣守紫宸萬機事摠聽朝
之暇得展于懷十數年間棟華凋落謂之手足唯有大哥今復淪
亡眇然無對以茲感慕何恨如之然以厥初生人孰不殂謝所貴光
昭德行以示崇高立德立名斯為不朽大哥事跡身歿讓存故冊
曰讓皇帝神之昭格當茲寵榮況庭訓傳家璫等申讓善述先志
實有遺風成其美也恭惟緒言怳焉如在寄之翰墨悲不自勝又
制追贈憲妃元氏為恭皇后祔葬于橋陵之側及將葬上遣中使
勅璫等務令儉約送終之物皆令衆見所司請依諸陵舊例壙內
置千味食監護使左僕射裴耀卿奏曰尚食所料水陸等味一千

心忠順邦國垣翰宗枝羽儀般石跡封將期永固逝川不捨俄歎
促齡悼往之懷因心所切宜增寵命用節幽泉可贈太子少保葬
事官給陪葬橋陵瑀封漢中王歷都水使者恒王府司馬衛尉負
外卿瑀早有才望偉儀表初爲隴西郡公天寶十五載從玄宗幸
蜀至漢中因封漢中王仍加銀青光祿大夫漢中郡太守乾元二
年以特進試太常卿送寧國公至迴紇充冊立使玢蒼梧郡開
國公歷銀青光祿大夫秘書監負外置同正負卒贈江陵大都督
玢封晉昌郡開國公瑄魏郡開國公瑊文安郡開國公天寶十一
載玢瑄瑊並食邑三千戶

惠莊太子撫睿宗第二子也本名成美母柳氏掖庭宮人撫之初
生則天嘗以示僧萬迴萬迴曰此兒是西域大樹之精養之宜兄
弟則天甚悅始令列於兄弟之次垂拱三年封恒王尋却入閣改
封衡陽郡王累授尚衣奉御神龍元年加賜實封二百戶通前五
百戶遷司農少卿加銀青光祿大夫睿宗踐祚進封申王遷右衛

大將軍景雲元年七月遷殿中監兼檢校右衛大將軍二年轉光祿卿右金吾衛大將軍先天元年七月加實封一千戶八月行司徒兼益州大都督開元二年帶司徒兼幽州刺史俄避昭成太后之稱改名撝歷鄧號絳三州刺史八年因入朝停刺史依舊爲司徒性弘裕儀形瓌偉善於飲啖十二年病薨冊贈惠莊太子陪葬橋陵無子初養讓帝子珣封同安郡王先卒天寶三載又以讓帝子璿爲嗣申王授鴻臚貲外卿

惠文太子範睿宗第四子也本名隆範後避玄宗連名改單稱範初封鄭王尋改封衛王長壽二年隨例却入閣徙封巴陵郡王累授尚食奉御神龍元年遷太府貲外少卿加賜實封二百戶通前五百戶景龍年兼隴州別駕加銀青光祿大夫睿宗踐祚進封岐王又加實封五百戶拜太常卿兼左羽林大將軍先天二年從上討竇懷貞蕭至忠等以功加賜實封滿五千戶下制褒美開元初拜太子少師帶本官歷絳鄭岐三州刺史八年遷太子太傅範

好學工書雅愛文章之士士無貴賤皆盡禮接待與閭朝隱劉庭琦張諤鄭繇篇題唱和又多聚書畫古跡爲時所稱時上禁約王公不令與外人交結駙馬都尉裴虛已坐與軌遊讌兼私挾讖緯之書配徙嶺外萬年尉劉庭琦太祝張諤皆坐與範飲酒賦詩黜庭琦爲雅州司戶諤爲山莊丞然上未嘗間軌恩情如初謂左右曰我兄弟友愛天至必無異意祇是趨競之輩強相託附耳我終不以纖芥之故責及兄弟也時王毛仲等本起微賤皆崇貴傾於朝廷諸王每相見假立引待獨軌見之色莊十四年病薨上哭之甚慟輟朝三日爲之追福手寫老子經徹膳累旬百寮上表勸喻然後復常開元十四年命工部尚書攝太尉盧從愿冊贈王爲惠文太子陪葬橋陵一子瑾封河東郡王官至太僕卿冒于酒色竟暴卒贈太子少師天寶三載又以惠宣太子男略陽公珍爲嗣岐王銀青光祿大夫宗正負外卿上元二年珍與朱融喜珍儀表偉如頗類玄宗融乃誘崔昌趙非熊等并中官六軍人同謀逆融謂

金吾將軍邢濟曰今城中草草關外近更憑凌若何濟曰我金吾天子押衙死生隨之安能自脫融曰有一人足下見之自當知縱不出城亦無慮乃引以見珍濟奏之乃令御史中丞劾羽訊之珍賜死其同謀右武衛將軍竇如玠試都水使者崔昌右羽林軍大將軍劉從諫蔚州長鎮將朱融右衛將軍胡列直司天臺通玄院高抱素右司禦率府率魏兆內侍省內謁者監王道成等九人特宜斬決試太子洗馬兼知司天臺冬官正事趙非熊陳王府長史陳閔楚州司馬張昂右武衛兵曹焦自榮前鳳翔府郾縣主簿李岳國子監廣文進士張奐等六人特宜杖殺駙馬都尉薛履謙預述謀宜賜自盡乃以濟兼桂州都督侍御史元桂管防禦都使左散騎常侍張鎬坐與交通貶辰州司戶鄭繇者鄭州滎陽人北齊吏部尚書述五代孫也工五言詩開元初範爲岐州刺史繇爲長史範失白鷹繇爲失白鷹詩當時以爲絕唱後爲湖州刺史子審亦善詩詠乾元中任秦州刺史

惠宣太子業睿宗第五子也本名隆業後單名業垂拱三年封趙王開府置官屬長壽二年隨例却入閣改封中山郡王累授都水使者尋又改封彭城郡王神龍元年加賜實封二百戶通前五百戶景龍二年兼陳州別駕銀青光祿大夫太僕少卿別駕如故睿宗即位進封薛王加封滿一千戶拜秘書監兼右羽林大將軍俄轉宗正卿睿宗以業好學而授秘書監及玄宗誅蕭至忠岑羲等業以翊從之功加實封通舊爲五千戶開元初歷太子少保同涇衛衛號等州刺史八年遷太子太保初業母早終從母賢妃親鞠養之至是迎賢妃出就外宅事之甚謹業同母妹淮陽涼國二公主亦早卒業撫愛其子逾於己子上以業孝友特加親愛業嘗疾病上親爲祈禱及愈車駕幸其第置酒讌樂更爲初生之歡玄宗賦詩曰昔見漳濱卧言將人事違今逢誕慶日猶謂學仙歸棠棣花重滿鵲原鳥丹飛其恩意如此十三年上嘗不豫業妃弟內直郎韋賓與殿中監皇甫恂私議休咎事發玄宗令杖殺韋賓左

遷皇甫恂爲錦州刺史妃惶懼降服待罪業亦不敢入謁上遽令召之業至階下逡巡請罪上降階就執其手曰吾若有心猜阻兄弟者天地神明所共咎罪乃歡讌久之仍慰諭妃令復其位二十一年業進拜司徒二十年正月薨冊贈惠宣太子陪葬橋陵有子十一人瑗樂安郡王瑒宗正卿榮陽郡王珣封嗣薛王珍嗣岐王瑄爲金紫光祿大夫鴻臚卿同正貢天寶五載坐舅刑部尚書韋堅爲右相李林甫所構貶夷陵郡別駕長任母隨珣竟以憂死七載珣於夜郎安置後移南浦郡十四載安祿山反赴于西京
隋王隆悌睿宗第六子也初封汝南郡王長安初拜尚乘直長早薨睿宗踐極追封隋王贈荊州大都督無子

史臣曰夫得天下而治者其道舒而有變讓天下而退者其道卷而常存何者飛龍在天舒也亢龍有悔變也讓皇帝守无咎於或躍利終吉於勞謙其用有光其間莫朽惠莊惠文惠宣隋王等或守常而獲免終保皇枝或過望而包羞竟塵青史略陽公信魁偉

之狀起圖謀之心福善禍淫宜哉不令

贊曰謙而受益讓以成賢唐屬之美憲得其先長不居震剛不乘乾讓之大者胡可比焉撫範已降同氣連枝性習何遠非革即睽有善有惡禍福不欺

唐書列傳卷第四十五

右文林郎充兩浙東路提舉茶鹽司幹辦公事蘇之勤校勘